

# NDÀÀYI, NÙKAMBÈ



...kufila bujaadiki, nenku Mwanèètù wa bakàji mukese udi paanyimà pààpa wàwa, ngeela meeji ne cidi cileeya musambu awu ne:

Kaa, dinanga dya Nzambi, mushindu mwine  
wùdidi dibanjike ne dikezùke's wè!  
Mushindu mwine wùdidi dya ndòndò kàyi  
dipima ne dikolè!

Ditùkù kaayi bwetu twètù's wè! Twänjàayikù bitùùlùbitùùlù, ne mitù yetu miinyika mpindyewu, kuwimbila Mukalenge kumpalà kwa disambila. Anji, Teddy, bu mēwè mwa kuswà, tūpēeshèku cyonà ndambu. Nenku twänjàayikù anu kuwimbila...ne mitù yetu miinyika, mēsù mabwita, anu kumpalà kwa disambila.

Kaa, dinanga dya Nzambi, mushindu mwine  
wùdidi dibanjike ne dikezùke's wè!  
Mushindu mwine wùdidi dya ndòndò kàyi  
dipima ne dikolè!  
Nediikalè kashidi... [Katùpà kàà mukàbà wà  
mèyi munda mutupù—Muf.]

<sup>2</sup> Bu màyi a mufundu, bu màyi ònsò mwa kwandamuka màyi a mufundu, ne maulu ònsò mwa kuvwijibwa mukàndà muvùnga, ne kaamuci kònsò pa buloba mwa kwikala kasalà, ne muntu yònsò mufundi bu ne ki wèndè mudimu, kadi kabivwakù mwa kwambila patòòke ndelàngànyì ya Adàmà yìdì midishinde dinanga dya Nzambi to. Tudi tuKwela twasàkidila, Taatù, bwa Mashi a mushinga mukolè a Mukalenge Yesu awu, ne bwa dinda dya civulukilu dya dibiishiibwa dya ku lufù adi, ne bwa dinanga Dyebe dya bupikudi didi dipòngòlòdiibwe mu myoyi yetu leelu ewu edi, kùdì Nyuma Mwímpè. Ditùbweja mu bwobùmwè Nendè, Nzambi Awu, Mufùki. Tùbwejèku mu bwànà bwètù, pa buloba, bùdì kacya kabùyikù bwanji kupiciibwa to. Diswa nansha òmwè, mucipù nansha wùmwè, kì mbifwànyineku kupalākajībwa ne bwànà bwètù bwa balume ne bakàji balediibwe cyākàbidì to, nansha kakese. Ne neciikalè kashidi musambu wà bansantu ne banjèlo!

<sup>3</sup> Tudi tulòmba leelu ewu bwa Wabèneshakù byònsò bitùdì twenza mu kuteeta kwamba patòòke, kusàkidila kwetu—kwetu mu myoyi yetu Kùdì, bwa byÙdì mutwènzèle. Ne bwa kumanya ne kì ng'anu myoyi ya bayiidi yàkavwijibwà ne disànka mu dinda adi, Mariya ne Mariya wa ku Magàdàlà to, kadi twètù kabidi, bayiidi Beebe leelu ewu, myoyi yetu mmivwijibwe ne disànka pa dībà ditùdì tusangana ne Yèyè kì mmufwè to, kadi

ùdi ne mwoyi. Swàku bwa Yéyè àshaalè ne mwoyi mu yetu peetu myoyi, munkaci mwetu. Tudi tulòmba mu Dìna dya Yesu. Amen.

Kì nkufwànyìnekù kwikala muntu nansha umwe udi mwa kujìkula patòòke dibìshiihwa dya ku lufù nansha!

<sup>4</sup> Mpindyewu, mu dinda dya dibìshiihwa dya ku lufù edi, ncikondo cilenga cya dikèma bwa tuumaalu tukese kwenzekatù mu ekeleeziya mpindyewu, mbwena kwamba ne, baamaamù bálàmbula bânà bààbò balela bàà mu mabòkò. Ncintu cipyacìpyà, cintu kampàndà cìdì cisàkidiibwe mu dìkù dyabo. Dibènesha kampàndà dipyadìpyà ndilwè kùdìbo. Ne bòbò, bwa kuleeja disàkidila, mbaswè kufila dyòdì adi kùdì Nzambi.

<sup>5</sup> Ne pashìishe paanyimà pàà di—diyisha dya mu dinda, netwènzè disambidila dya babèèdi, bwa nwamòna mwa kwikala babìshiihwe ku mabèèdi ènù, kubwejiibwa mu bukolè bwa mubidi bupyabùpyà. Pashìishe dyàkàmwè paanyimà pàà aci, bwa aba bàtù kabàyi babàtìjiihwe, netùpetè dibìshiihwa ku cyòci aci; kujiikiibwa mu màyi, bwa kajuuka ku mwoyi mupyamùpyà. Cyònsò mu kaabujimà cidi anu dibìshiihwa dya ku lufù mu dinda emu, dibìshiihwa dya ku lufù! Myoyi yetu mmivwijiibwe ne disànkà ne mipeepèle, patùdì twimba misambu ne tutèeleja majaadiki a bakwabo, a dibìshiihwa dya ku lufù dya dinda dilenga dya dikèma edi. Ne tutàngila pambèlu tumòna ne Nzambi ùdi ne disànkà bwa cyòci aci, micì miikàle yìbìshiihwa ku lufù.

<sup>6</sup> Kùkaadi cikondo kampànda, mu Kentucky mwàmwa, mèmè ne Mukalenge Wood tuvwa tutwà buluwà bwa nshìndì, ki twètù kuya too ne mwaba wà muntu kampànda. Muntu awu ùdi mwa kwikala musòmbe kaaba aka mpindyewu mene, bwa ku dyànyì pàànyì dimanya. Ne yéyè awu ùvwa mumanya ne mmwena dyabùlù. Ki Mwanèètù Wood kumulòmbayè, wàmba ne: “Ndikù mwa kulemba nshìndì mu mwaba wèbè ewu anyi?”

Yéyè ne: “Eyowa, Wood, udi mwa kulemba nshìndì. Ndààku.”

Yéyè ne: “Ee, ndi mwendè pàmwè ne mpaasàtà wanyì’s.”

<sup>7</sup> Ki yéyè ne: “Wood, kùngambidìku ne ukàadi mulwè wa ciipanshì mu mushindu wà ne bikaadi bìkèngela bwa kwikala wenda wenda ne muyiishi dìbà dyònsò to!”

<sup>8</sup> Ki kumbiikilayè bwa—bwa yéyè kundeeja kùdìye. Ne yéyè muntu awu ùvwa mwambè mùvwàye muntu wa maalu makolè. Bàvwa bamwambile kùdì bakwabo, cyòci aci, kadi kàvwakù mufwànyine kumòna cintu nansha cimwè cya kumufikisha ku kwitabuuja to.

<sup>9</sup> Nenku kùvwa mucì wà pommes mwaba awu kùmvwà mupòòle cimuma cya pomme. Tuvwa mu ngondo wa

mwandamukùlù. Ki mèmè kwambila mulùmýàna wa bukàlàngà awu, mèmè ne: “Muci wàwa wùkaadi ne bidimu bìngà?”

<sup>10</sup> Ki yèyè ne: “Bidimu bu makumi asatu,” cintu bu nanku awu. Yèyè nguvwa muwùkùne.

<sup>11</sup> Ki mèmè ne: “Ukàadi mudyàdyàdye bimuma byàwù kacya anu wàbanga kukwàma’s?”

“Eyowa’s, mukalenge.”

<sup>12</sup> Mèmè ne: “Cidì cyènzekelà mucì wàwa ncinyi? Wèwè muwùtàngìle, tudi mu ngondo wa mwandamukùlù mpindyewu, kuulu kùvwa kwa luuya lukolè díbà dyònsò; kadi mpindyewu mabèjì mmabangè kupòpoka ku mucì awu, ne màyi a mucì àdi munkaci mwa kuumuka mu matàmbà, àpweka àkabwela mu miji. Bu òwò mwa kushààla kuulu eku mu movù wà mashika, mucì awu kî mmufwànyìne kwikalaku kabidi to; kadi àdi àpweka àkabwela mu buloba, bwa kusokoma mpepèlè ya mashika ayi. Bu òwò mwa kushààla kuulu eku, mucì mmufwànyìne kufwà, kawùyi mufwànyìne kukwàma kabidi bimuma bya pommes to. Kadi àdi àpweka bwa kuya kasokomena mu miji, bwa kwalukilawù cidimu cyàlondà, bwa kukutwàdilakù ndambu wa bimuma bya pommes bya bifùmina ku mwaba kampànda, ne mabèjì.”

<sup>13</sup> Ki mèmè ne: “Mpindyewu, mukalenge, ndi—ndi nkulòmba bwa ùngambilèku ne m’Meeji kaayi àdi ènza ne màyi a mucì awu ùmukè mu mucì amu kumpàlà kwa cikondo kanà cyònsò cya mashika, àpwekè àkabwelè mu miji bwa kusokomawù awu? Wèwè mwa kungambila cidì cyènza nanku aci, ne kucìngumvwija, cidì cyènza aci, díbà àdi mèmè nènukèkèlè ulenga Nzambi.” Mèmè kwamba ne: “Tèèkabi màyi ku dikunji tũng tũmone ní àcyènza, tũmonèbi dishintuuka dya mivù adi ní dyàcyènza. Kùdi Kampànda munene wa meeji udi utùma màyi a mucì awu bwa kubwelawù mu muji wà mucì awu, ne pashiishe àalukija ne mwoyi mupyamùpyà. Ki Nzambi awu.”

<sup>14</sup> Ki yèyè ne: “Kacya ncitukù mutàmbe kuya mu ekeleeziya to.” Yèyè ne: “Kadi kwàkalwa muyiishi kampànda mu Acton emu, musangu kampànda, kwambilayè mukàjì kampànda, uvwa musòmbèle pa kakùnà apu, mwanààbò wa bakàjì ùvwa mu disangisha dilòlò adi, ne kumwambilayè mùvwàye ùsambidila mwanààbò wa bakàjì uvwa ne kànsèrè.” Ki yèyè ne: “Mèmè ne mukàjàànyì tuvwa kwòkù aku bwa kumwambulwisha.” Ki yèyè ne: “Ùvwa bibì be, ne kànsèrè kàà mu cifù, mu mushindu wà ne byàkakèngela bwa kwikalabò bà mukùdimwina mu cilàmbà mu bulààlù, ne bikwabo. Mwanààbò wa bakàjì kwaluukilayè ne mùshwàlà,” yèyè ne, “paanyimà pàà muntu awu mumanè kumwambila bwa màsaamà èndè awu ne byònsò, mumwambile bwa ‘kamutentekela mùshwàlà awu.” Ki yèyè ne: “Ùdi ne mubidi tumatuma leelu ewu.”

15 “Nanku aci’s cidi anu cileeja ne,” mêmè ne: “Kampànda umwèumwè wa meeji uvwa wambila mâyi awu mu mucu awu, ku cidimu ne ku cidimu cyònsò, wèwè mudimwène ne èbè àbidì, bwa kupwekawù mu miji bwa kusokomawù awu, ùvwa n’Kampànda umwèumwè wa meeji wàkangambila mêmè ne mukàji awu ùvwa mwa kwondopiibwa bu yèyè mwa kutentekela . . .” Mêmè ne: “Aci kî ncyà—cya kaciyi cìtàmba kuumvwika to. Wèwè’s udi ne muyiishi mutàmbe bwìmpè mu lubànzà lwèbè, mucu awu, udi ukwambilaci ku cidimu ne ku cidimu.”

16 Bu twètù anu mwa kutàngila ku nseke yònsò, s’tudi tumòna Nzambi myaba yònsò. Yèyè ùdi mu mucu wònsò, mu kabèji kònsò kàà dishindà. Kakwèna cintu nansha cìmwè cidi mwa kukàpàtula to anu Nzambi. Twètù tudi mwa kupàtula cintu cifwànàngàne naakù; kadi mwoyi awu to, n’Nzambi.

17 Mpindyewu, kabèji kakese kàà dishinda nkasàkidiibwe ku mèkù kampànda kaaba aka, nenku tudi baswè kulàmbula bàna bakese bàà mu mabòkò aba kùdi Mukalenge. Teddy, tutu ne kaamusambu kakese mwab’ewu katùtù twimba ne, *Bwelàayi Naabò Mùneemu*, swàku wimbè cyòci aci pàdi baamààmù bàdi baswè bwa bàna bààbò bàà mu mabòkò bàlambudiibwè apa, ne baataatù, nebàlwe ne bàna bààbò bakese ku cyoshelu eku.

18 Nenku tudi ne tuubilòngò tukese twa Paasàkà kaaba aka pa cyoshelu mu dinda emu, kî mmwòmò anyi? Ekelekele, ekelekele! Ndi ndìfwànyikijila ne kùdi tu-Màriyà, tu-Luutà, tu-Leebèkà, tu-Yakòbò, Pòlò, ne Yone, mwaba wònsò ewu, tuubilòngò tukese twa Paasàkà bwa lukòngò lukwabo.

19 Mbìmpè, kaaba aku mene. Ngeela meeji ne Mwanèètù Beeler mmuswè kukwàta mwànà mukese udi mwimàne kaaba aka ewu—ewu fòtò, yèyè ewu—yèyè ewu mmwikùlwèndè wa Mwanèètù Wood, Mwanèètù wa bakàji Wood ewu. Ne bakwabo bàdi mpindyewu bènda bàlwa ne bàna bààbò bakese. Lwàyi buludì, nwènù abu. Abi mbìmpè. Mwanèètù Neville.

20 Disangila dya mu nsòmbelu wa cijila wa bantu basèlàngàne ndìmpè bikole, ndilongolola kùdi Nzambi. Nenku ku nsòmbelu wa cijila wa bantu basèlàngàne eku nkùdi kùtwàla bàna bakese bananga bàà mu mabòkò aba.

21 Nebikengelè ùngambilè dìnà dyèndè mpindyewu. Brenda Sue. Udi ne mmwènekèlu mushiilàngàne be, wèwè mwànà, mushiilàngàne ne pàngàakumònu musangu wà kumpàla. Ee, Brenda Sue Wood mwànà nyèyè ewu, kantu kakese kàà musinga wà menemene mu myoyi yetu bònsò, ne nangàngà bwa maamù mutekète ewu ne taatù.

22 Ne mu bikondo bya Bible. Bantu bààbùngi bàtu bàmyamina bàna bakese bàà mu mabòkò aba mâyi; kadi twètù tudi tuteeta kulonda pabwìpì menemene muyaayà Bible ne mwetu mwònsò. Kacya katùtùkù bamòne mwaba wùkaadìbo bamyamìnyìbwe mâyi to, mu Bible, kadi bààkaLwakù naabo kùdi Mukalenge

Yesu ne Yèyè wàkabàbènesha. Nenku twètù, bu basadidi Bèndè, tudi tubàngata ne tubàbàndisha kùdìYe.

<sup>23</sup> Ngeela meeji ne nudi bamanyè mùdì kakwëndè mulùme ùdifyela, nudi bamanyè's. Pa nanku twinyikààyikù mitù bwa katanci kakese cyanààna.

<sup>24</sup> Mukalenge Yesu, Mwànà wa Nzambi, Wákafidiibwa bwa bwenzàvi bwetu. Ne ncintu cya mushinga mukolè be pa kumòna bânà bakese bâlwa naabò Kùdì, bu civùlukilu cya cyàkenzekà kùkaadi bidimu byàbùngì aci, pààkalwà baamaamù ne baataatù ne bânà bààbò bakese Kùdì. Nyewu tudi bambùle kumpàlà Kwèbè, leelu ewu, mu mabòkò a diitabuuja, Brenda Sue Wood mwànà ewu, udi mutùmùibwa mu dîkù dya Mwanèètù David ne mukàjèndè wa mushinga mukole ewu. Taatù Nzambi, bèneshàku mwànà ewu.

<sup>25</sup> Bàdi bàjikula diitabuuja dyabo Kùdì, pàdìbo bàfila mùtòlokù wà ku disangila dyabo apa. Nenku tudi tulòmba bwa Wèwè kubàbènesha. Ne swàku bwa myoyi yabo yìkwatè kapya kàà Nyuma Mwimpè, bwa kwikalabò ne nsòmbelu ya difwànà dya Nzambi menemene, ya didilàmbula, bwa mwànà ewu àkoleshiibwè mu dîkù dya beena Kilisto, àkoleshiibwè mu mibelu ya Nzambi, àlaalè àboobokè, ne nsòmbelu wa dyèsè pànu pa buloba, ne àKukwàcilè mudimu mu matùkù èndè ònsò a mwoyi. Ne mu Butumbi, mwàdisangà maafamiyè amu, swàku bwa Brenda Sue mwànà ewu ne papa ne maman wendè, ne bàà kwabo bònsò, bààdisanga banyùngùlùkile nkwasà wa butumbi wa Nzambi, bapikula kùdì ngàsà wa Kilisto, kutùdi tumubàndisha kùdìYe mpindyewu.

<sup>26</sup> Mwakùnyànyì wa bakàjì, ndi nkufila mpindyewu kùdì Mukalenge Yesu Kilisto, bwa nsòmbelu wa diMukwàcila mudimu, mu Dìnà dya Yesu Kilisto, Mwànà wa Nzambi. Amen.

<sup>27</sup> Nzambi ànùbènéshè, Marilyn, David, dyèsè dyàbùngì ne dyàkalenga. Mwànà mukese ewu ikalèku ne mwoyi bwa Bukalenge bwa Nzambi.

<sup>28</sup> Mpindyewu, mwànà mulenga wa balùme nyèyè ewu, ne mimwemwe yàbùngì kwísù. Dyèndè nganyi? [Maamù ùdi wàndamuna. Katùpà kàà mukàbà wà mèyì munda mutupù—Muf.]

Sharon Rose... [Maamù ùdi wàmba ne: “Sharon Daulton.”—Muf.] Daulton. Daulton. Mmwànà wa Mwanèètù Ed anyi? Ee, mu mushindu kampànda, kùkaadi bidimu bitwè ku makumi abidi ne bibidi, Nzambi wàkuumusha Sharon Rose mwànà mu mabòkò àànyì, ùdi mu Dyulu, leelu ewu. Nenku mpindyewu, utùdì tufila kùdìYe ewu, n’Sharon Rose Daulton. Tudi bamanyè Mwanèètù wa balùme Ed ne Mwanèètù wa bakàjì Daulton, mwab’ewu, bu balundà beetu bàà mushinga mukolè. Mwànà bulengayè!

Taatù wetù wa mu Dyulu, nyewu tulwa ne Sharon Rose mwânà ewu Kùdi. Bu civùlukilu cya Mukalenge munene Yesu, Wâkiimana pa buloba ebu awu, ne kuMutwàdilabò bânà bakese bàà bakàji mùdi ewu nùнку, nyewu ndi nsambidila mwânà ewu, Mukalenge. Swàku bwa ìkalè ne mwoyi ne dikàndà ne mubidi tumatuma. Swàku bwa ìkalè ne mwoyi bwa butùmbi bwa Nzambi. Bèshàku tatwèndè ne mamwèndè. Swàku bwa àkoleshiibwè mu mibelu ya Nzambi. Bàdi bàjikula diitabuuja dyabo Kùdi pàdìbo bàfila mwanàabò wa mulela Kùdi apa. Mpindyewu, tudi tuKupèèsha Sharon Rose Daulton mwânà ewu, bwa Wèwè kubènesha nsòmbelu wendè, Mukalenge. Ndi mmuumusha mu mabòkò a mamwèndè ne tatwèndè, mmufla Kùdi, Mukalenge ne Musungidi wanyi, Yesu Kilisto, bwa butùmbi Bwèndè. Amen.

Nzambi àkubènèshè, wèwè mwanèètù wa bakàji, ne wèwè, mwanèètù wa balùme.

Kaa, ekelekele! Mwânà mukese wa balùme, mubèèdi. Lutàtù lwèndè lùdi cinyi? [Maamù ùdi wàmba ne: “Mutù wèndè wùdi wènda ùdyundakana.” Katùpà kàà mukàbà wà mèyi munda mutupù—Muf.] . . . cintu kampàndà cya cishìilàngàne. Mèmè ndi mMwitabuuja Yèyè.

Mukalenge, Nzambi, nyewu ndi mukwàte Mason mwânà mmufla Kùdi. Ndi ndòmba, Mukalenge Yesu, bwa Wàngatèku mwânà wa mu dibòkò wùndi mukwàte mu mabòkò àànyì mwab’ewu ewu, bwa kumulàmbula Kùdi. Ndi ngeela lutàtù lùdi pambidi pèndè elu mulawu. Mu Dìná dya Yesu Kilisto, swàku bwa Mason mwânà àteekiibwè mu Èbè mabòkò, Mukalenge, ne swàku bwa lutàtù elu lumuumukè. Swàku bwa mwânà ewu ìkalè ne mwoyi bwa luumù ne butùmbi bwa Nzambi. Baledi bàdi bàjikula patòðke diitabuuja dyabo pàdìbo bàlwa nendè apa. Swàku Wòndopè mwânà ewu ùmusàngàjè. Swàku bwa ìkalè ne mwoyi bwa butùmbi bwa Nzambi, bwa kuKukwàcilayè mudimu. Mukalenge Nzambi, ndi nKupèèsha Mason mwânà ewu, mu Dìná dya Yesu Kilisto, bwa mwoyi wèndè ne bwa dyondopiibwa dyèndè. Amen.

[Katùpà kàà mukàbà wà mèyi munda mutupù—Muf.] Itàbùùjaayi anu ne mwoyi mujimà.

Kaa, mmwânà mukese wa bakàji kabidi anyi? Ee, mbìmpè. Seemèna apa, kakàjààna. Imànyìnà anu lwà apa nùнку. Dìná dyèbè didi . . . ? [Taatù ùdi wàmba ne: “Sumner.”—Muf.] Sumner. Mwanèètù wa balùme ne Mwanèètù wa bakàji Sumner. Ngeela meeji ne nudi bàà mu Géorgie, kí mmwòmò anyi? Mvwa mwele meeji ne mvwa muvùlùke disambila. Kùdi bantu bààbùngì kuntwaku. Ewu ki . . . [“Latrelle.”] Latrelle. [“Dwight.”] Dwight. [“David.”] Ne David. Numvù ménà àbò. Nzambi àfundèku ménà àbò mu Mukàndà wà Mwoyi wà Mwânà wa Mukòòkò.

Taatù wetù wa mu Dyulu, nyewu tulwa ne bânà bakese bananga aba Kùdi mu dinda emu, pândi ntenteka byanza byanyi pa tuubipya tukese ku mitù yabo apa, ne tusukì tukese tunefùke twà twânà twà balùme etu. Èyi Mukalenge, bàbènèshèku. Baledi baabo mbaleejè dinanga dyabo ne diitabuuja dyabo Kùdi pa kufila bânà baabo balela. Nenku nyewu tubàlàmbula Kùdi, Mukalenge, pàdìbo bùumushiibwa mu mabòkò a baledi baabo apa, bwa kubiimànyika kaaba aka pa cyoshelu eci mu dinda emu, bwa kulàmbula myoyi kùdi Nzambi. Bàbènèshèku, Taatù. Tudi tulòmba bwa Wèwè kubàfikisha ku diikala ne nsòmbelu wa dyèsè, matùkù àbò ònsò a mwoyi, Mwoyi wà Cyendeleelu mu buloba bùcìvwawwà. Swàku bwa bàkoleshiibwè mu mibelu ya Nzambi, mu dìkù dya beena Kilisto.

Mpindyewu, ku mudimu muntùma naawù kùdi Yesu Kilisto, mufilè cileejilu kùdi bambi Bèndè, bwa ne bàdi ne cya kulonda mùdiYe Yèyè mwenzè, ndi mbàfila Kùdi, mu Dìnà dya Yesu Kilisto. Amen.

[Katùpà kàà mukàbà wà mèyi munda mutupù—Muf.]

Mwàmwa mu ditùngà dya muunyà mukolè dya Géorgie, mbalwè ne mwânà ewu mwab'ewu kùdi tatwèndè munanga ne mamwèndè, bwa kulàmbudiibwayè Kùdi mu dinda dya civùlukilu edi. Ncivùlukilu cya ngàsà Webè mu dìkù dyabo. Ndi ndòmba bwa Ùbeneshèku Renee mwânà ewu, mamwèndè ne tatwèndè. Ne bóbò bàdi bàjikula diitabuuja dyabo Kùdi, pa kulwa ne mwânà ewu, bàkèba mabènesha Èbè pambidì pèndè. Nenku swàku bwa ikalè ne mwoyi ne ikalè mwena Kilisto wa dikàndà, wa dyèsè, matùkù èndè ònsò a mwoyi; ne ikalè ne Mwoyi wà Cyendelele mu matùkù àcìlwalwà, mu buloba bùcìlwalwà. Enzàku nanku, Taatù. Múvwà Wèwè mwambùle tuntu tukese twà bupòle atu, anu mùdi bânà bakese aba mu dinda edi, mu mabòkò Èbè Sungasunga emu, mèkù ngàà majìkùle diitabuuja dyawù patòòke Kùdi, pa kulwa naabò kùdi basadidi Bèèbè. Nenku nyewu tubènesha Renee mwânà ewu ne tumufila Kùdi; tumuumusha mu mabòkò a baledi bèndè, tumufila Kùdi. Mu Dìnà dya Yesu Kilisto, swàku Ùmubènèshè. Amen.

Àkubènèshè, mwanèètù wa balùme. Nzambi àkubènèshè, Renee.

Twànjàayi kwimba kaacitùminyì kàmwèpelè kàà cyòci aci.

Bwelàayi naabò mùneemu, bwelàayi naabò mùneemu,  
 Bwelàayi naabò mùneemu nubùmùshè mu myaba ya mpekaatu;  
 Bwelàayi naabò mùneemu, bwelàayi naabò mùneemu,  
 Lwàyi ne bânà bakese kùdi Yesu.

<sup>29</sup> Kaa, mushindu mwine wúmvw'á kwikala mwimane mu mulongo awu ne mwakùle bwa yònsò wa ku bânà bakese abu's wè, kadi byòbì biine, ndi ne lujòòkò be, ne bantu pààbò biimàne kuulu. Mwanèètù Wood mmungambile mu dinda emu, wàmba ne nyimà ùwva anu ùmusaama, bwa diimana dya kuulu. Kanwèna bamanyè mündi ngaanyisha diimana dya kuulu ne dindila adi to! Nenku nêngènzè anu lùkàsà mu diyiisha, ne mwànyì mwònsò. Kadi tèèlejààyi ne ntèmà yònsò.

<sup>30</sup> Ncìvwa mupetè dībà dya kulongolola disangisha dya mu dinda emu edi to, anyì diyiisha edi mu dinda emu, anu mutancì mukese cyanàànà. Ndi mwangàte cyena-bwalu kampàndà ne cintu kampàndà cya cishìlàngàne.

<sup>31</sup> Ne Paasàkà wa musangu mushààle mvwa muiyishè pa cyena-bwalu cya ne: “*Mwikàle Nè Mwoyi*, kunnangaYè. *Ufwa*, kunsùngilaYè. *Mujiikùbwe*, kwangataYè mpekaatu yànyì e kuya naayì kule. *Ùbùka Kù Lufù*, kumbingishaYè pàtupù bwa kashidi. Dìngà ditùkù Yèyè *Ùlwalwa*, kaa, ditùkù dya butùmbi's wè!”

Ne pashiishe mu dinda edi twàyiishì pa cyena-bwalu cya ne: *Ndi Mumanyè*.

<sup>32</sup> Nenku mpindyewu, bu Mukalenge mwa kwanyisha, ndi muswè kubala mu nshapità wa Maakò Munsantu. Nenku nùsambilààyikù pàmwè naanyì mpindyewu.

<sup>33</sup> Ne dyàkàmwè paanyimà pàà cyòci eci nekwikalè mudimu wà dyondopa. Ne pashiishe paanyimà pàà mudimu wà dyondopa nekwikalè mudimu wà dibàtiiza. Ne pashiishe nekwikalè masangisha dilòòlò edi pa dībà mwandamutekètè ne tusunsa makumi asatu.

<sup>34</sup> Mpindyewu Maakò 16.

*Nenku pààkapità nsabatu, Màriyà wa ku Magàdàlà, . . . Màriyà mamwèndè wa Yesu, ne Salòmè, bàvwa balwè ne mánànanshì a mupùùyà mwìmpè, bwa kulwabò naawù ne kumwelawù.*

*. . . dinda bwebwebwe ditùkù dya kumpàlà dya lumingu, bòbò bààkalwa ku lukità pa dijuuka dya dībà.*

*Nenku bààkamba munkaci mwabo ne: Watùbùngulujila dibwe dya ku mushikù wà mbèlù wà lukità nganyi?*

*Kadi pààkatàngilàbo, bàkamòna ne dibwe dikaavwa dimana kubùnguluja, bwalu òvwa dinene be.*

*Nenku pààkabwelàbo mu lukità, bààkamòna nsongààlùmè musòmbe ku luseke lwà dyàbalùme, muvwàle civwàlu citòòke cile, ne bòbò bààkakwàcika bwòwà.*

*Ki bòbò kubàmbila . . . Ki yèyè kubàmbila ne: Kanùcìnyì nansha; Nudi nukèba Yesu wa ku Nazàlèetà,*



*uwabò bapoopèlè pa nkùrusè awu; yéyè mmubiike ku lufù, kèna apa to; mōnaayi mwaba wūwābo bamulāādike.*

*Kādi kwātaayi njila ndāayi, ne nūkambilè bayiidi bèndè ne Peetèlò ne yéyè ùdi unūdyànjidila mu Ngalèlā: mwómò amu ki munwāmumwènà nwènù, mùvwāye munwāmbilè amu.*

*Ki kupātukabò lūkàsà, ne kuumukabò lubilu ku lukitā aku, bwalu bāvwa ne luzakalu ne bāvwa bākèma; kabāākambila muntu nansha umwe cintu nansha cimwè to, bwalu bāvwa ne bwōwà.*

*Mpindyewu pāākabiikā Yesu pa bwebwebwe ditūkù dya kumpālā dya lumingu, yéyè wākanji kumwènekela Māriyā wa ku Magādālā, uwāyè mwipāte démons mwandamutekète munda awu.*

*Nenku yéyè wākaya ne wākambila aba bāvwaye naabò, pāvwaye. . . pāvwābo bēnza madilu ne bādila.*

35 *Nudi numōna's, bōbò pāābò, bāvwa pa mushiki wā butù.*

*Kādi bōbò, pāākamanābo kuumvwa ne yéyè ùvwa ne mwoyi, ne ùvwa mumumwènèkèlè yéyè, kabāākiitabuujā to.*

36 *Mushindu mwine wùdi Mèyì a Nzambi kaāyì ùmvwika's wè!*

*Pāānyimā pāā aci yéyè wākamwènekela. . . mu mmwènekèlu mukwabo babidi bāā kùdìbo, pāvwābo bēnda bāya, ne bābwela mu musòkò.*

*Nenku pāvwa. . . ne bāākaya kacýāmbila bāvwa bashāāle, kādi abu kabāākabiitabuujā nansha bōbò to.*

*Pashūshe yéyè wākamwènekela baadikumi ne umwe pāvwbò basòmbe bādya byākudyā; ne yéyè wākabādyula bwa dipap-. . . bwa—bwa bupidyā bwabo ne dipapa dya myoyi yabo, bwalu kabāvwa bitābūūje aba bāvwa bamumōne pāvwaye mubiike ku lufù to.*

*Ne yéyè wākabāmbila ne: Ndāayi pa buloba bujimā, . . . nūyūishè cifukūibwā cyōnsò èvānjeeliyò.*

*Ewu udi witabuujā ne ùbātūiūibwā neāsungidiūibwè, . . . ewu udi kāyì witabuujā neāpiishūibwè.*

*Nenku bimanyinu ebi nebifilè aba bādì bitābuujā: Mu dīnā dyānyì bōbò nebūpatè baadémons; nebāākulè myakulu mipyamīpyā;*

*Nebākwatè nyòka ne byanza; . . . bōbò banwè cintu kanā cyōnsò cidì cishebeyanganā, kacýākubènzela bwalu to; nebātentekelè babèèdì byanza, . . . nebāsangalè.*

*Ki pashùishe paanyimà pàà Mukalenge mumanè kwakula naabò, wàkangacùbwa mu dyulu, ne wàkasòmba ku dyàbalùmè dya Nzambi.*

*Nenku bàakaya, ne bàakayiisha myaba yònsò, Mukalenge mwikàle ùkwàta naabò mudimu, ne ùshindika dīyì ku bimanyinu bivwà byènda bilonda. Amen.*

37 Ndi muswè kwangacila cyena-bwalu ku myaku yibidi: *Ndàayi, Nùkambè.*

38 Nudi bamanyè's, kabyènakù ne dikwàcisha bwa kuya to pawikalà kùyi ne cintu kampànda cya kwamba. Ndi mèmè ngeela meeji ne ki lutàtù lùdiku búngì cyanààna leelu ewu ndwòlò alu. Tudi tuya bwa kwamba, tuya kadi katùyi ne cintu cya kwamba to, cintu ciine cya nsongo, nansha cimwè cidì cifwànyine kukwàcisha bantu.

39 Kadi twètù tulonda dileeja dya njila mùvwà bayiidi bàakapetà mudimu mubàtuma naawù abu, twètù tudì ne mudimu wùmfwèwùmfwè awu mutùtùma naawù ne: “Ndàayi, nùkambilè bayiidi Bàanyi ne Ndi mubiike ku bafwè.” Ndàayi, nùkacyàmbè!

40 Pashùishe Yèyè ùdi wàmba ne: “Ndàayi, nùciyiishè, nùleejè bimanyinu bya ne Mèmè ndi ne mwoyi ne mubiike ku bafwè ebi.” Mukenji kaayi's wè! “Ndà, ùkambè, ne ndà, ùkaleejè bayiidi Bàanyi bintu biwàmònu ebi, bya ne Ncyèna mufwè to, kadi mubiike ku bafwè.”

41 Mu Dīyiisha dya dinda mu dinda emu, twàsangànyì ne yònsò wa kutùdi ùdi ne tuumishiki twà butù twà ntàtu ne mateata patùdi basòmbèle ku lusongo lwàbi, míngà misangu, bindilè disàmbiibwa. Tudi basangàne ne nkambwà munene Yobò wàkapeta cikèèna-kumòna, bwalu kabàvwakù banji kupeta Paasàkà kampànda to, kàdi yèyè wàkamòna dinda edi bidimu binunu binaayi kumpàla. Wàkamòna bidimu binunu binaayi kumpàla, Paasàkà kampànda, mu dikèngà dyèndè amu, ki kwelayè lubilà lukolè ne: “Ndi mumanyè ne Mupikudi wanyì ùdi ne mwoyi! Mu matùkù a ndekeelu, Yèyè neimanè pa buloba. Nansha paanyimà pàà misànda ya mu dikòba mimanè kubùtula mubidi ewu, nansha nanku mu mubidi wànyì mèmè nèmmonè Nzambi.”

42 Mpindyewu, paanyimà pàà Paasàkà, tudì tusangana ne Nzambi wàkapèèsha muntu mudimu mumutùma naawù ne: “Ndà, ùkambè! Ne wèwè mwambe cya bushuwa, *cikampànda* necikufilè. Ndà ùkambè!”

43 Mpindyewu, kabyèna ne dikwàcisha nansha dikese to, múngàmbi, bwa kuya, bwa kuya, paùdi kuyi ne cintu kampànda cya kwamba to. Kàdi wèwè ne mukenji wà mafi wà kwamba, díbà adi kabyàkwikalakù ne dikwàcisha to. Bìdi bikèngela wàmbè cidì mùnsokòntù awu.

44 Kùkaadi cikondo kampànda mvwa mbala mu mukànda kampànda, bwalu bwa mwànà mukese kampànda wa balùme uvwa... wàkabwela mu ditembangana. Nenku mu diine ditembangana edi ùvwa ne cya kudìpetela luumù lwà ùmanyika. Mwànà mukese wa balùme kanà yònsò uvwa mwa kulama mwakù wà ntandula mu mutù too ne pàvwàye ùfika pa kaaba kampànda, ne kwamba mwakù wà ntandula awu, mulami wa ku ciibi ùvwa mwa kumupìcisha. Cìvwa mbwà kuteeta cipidi cya dimanya cya mwànà awu. Nenku pàvwàye ùfika pa kaaba aku, wàmba mwakù wà ntandula wùvwàbo bamupèeshe awu, ciibi cìvwa cyùnzuluka ne yèyè ùvwa ùpeta luumù lunene.

45 Mwànà mukese kampànda wa balùme, mwikàle wa makàsà mapeepèle, ne mumanyè anu bîmpè bitàmbe ne yèyè ùvwa mwa kutàmba bânà bàà balùme bakwabo bònsò ku lubilu mu ditembangana adi, anyì mmùvwaye ùdyàmbidila. Kudìbidijayè ku ditùkù ne ku ditùkù, mu dinyeema dya lubilu. Mùvwàye wùjja tuubisùlùsùlù twèndè tukese atu, ùvwija mubidi wèndè mukàmàkàne, bwa kàfikikù ku dicyòka mu dinyeema amu to. Nenku kwibidijayè makàsà èndè mwa kwasa lubilu, ne mwa kutùkilayè bakwabo bânà bàà balùme abu kumpàla. Ne muvwàye ne cya kwikala wèyela mu cikondo cya dinyeema dya lubilu aci, bwa wàmòna mwa kulama lupeepèlè lùvwa lùlwa ku mubidi wèndè alu, bwa kumupèesha mushindu wà ùtùngunuka anu ne kuuja bisùlùsùlù, bwa kabitàmbi kufikisha mwoyi wèndè ku ditekesha lubilu to. Kucìlongayè mu mishindu yònsò ne mwèndè mwònsò.

46 Nenku mu dinda divwà mbilu ya ditembangana ayi yibanga, kùvwa bânà bàà balùme bapìte pa lukàmà ne makumi ataanu biimàne ku mulongo aku, bàà bidimu bùngi kampànda. Mwànà mukese wa balùme ewu ùvwa ne bunene ne bule bipìcidilekù, bwa bùngi bwa bidimu byèndè abi. Ki kuvùlukayè didìbidija dyèndè dyònsò adi. Ki kudìlongololayè. Kulwabò ku mulongo aku, kutwàbo tupalà ku—ku nshinga uvwa munana mwaba awu awu, kusàkabò tuumaùlù twabo tukese atu tulengè ku nshinga aku. Yèyè ùkaavwa mulongèlonge tunungu twàbi twònsò, mwikàle ùdìlongolola.

47 Nenku pashiishe pààkadilà kaacingoma, ne mwonji awu wùkòshiibwa, bânà bakese bàà balùme abu kwasabò lubilu. Nenku mwabilaayi wetù mukese ewu ùvwa ne mubidi mukùmbànàngàne mu mushindu wà ne yèyè wàkatùpika e kudyèla kumpàla kutàmba bakwabo abu. Ne kuyayè mu njila awu lubilu mùsà, mudìbidije bilenga, mu mushindu wà ne yèyè ngwàkatàmba mwànà wa balùme yònsò uvwa mu lubilu lwà ditembangana alu. Ki kufikayè mwaba awu, kaa, ntàntà wa dîbà mule, pàmwàpa kasunsa kajimà anyì tupìte apu kumpàla, kumpàla kwa bàvwà batàmbe kupiluka bàà ku banyeemi bakwabo abo kudyatabò mwaba awu.

48 Kàdi, ne didiibidija dyèndè dyònsò dya mubidi adi, yéyè ùvwa mupwè mwoyi mwakù wà ntandula. Ùvwa mupwè mwoyi cintu ciine cìvwà cikèngela kwamba, bwa kumupìcishabò mu ciibi amu. Ki kubangayè ùkaadi wàtwa dikàsà kumpàla wàtwa dikàsà paanyimà, wèla meeji, ùwùkèbulula mu meeji èndè. Yéyè ùvwa mutàmbe kudifila ku bya mu bufùki, bya mu bufùki bya mubidi wèndè, mu mushindu wà ne wàkapwà cintu cya mushinga mwoyi. Mu njila amu, mu diya amu, bàmwè bàà ku bàà bàà balùmè bàvwà kabàyi banyeemè lubilu lwà bwena lwèndè alu to, bàvwa bavùlùke mwakù wà ntandula, ki kubwelabò.

49 Ki mudibi kabidi leelu! Tudi twètù batàmbe kudifila ku diibaka dya myaba minsantu minene ya diya kabandila, ne maèkèleeziyà ne nzùbù ya màbàlaasà, ne bikwabo byònsò, ne badifile ku dilama dya ekeleeziya yetu mu mushindu mwìmpè, biikàle ne bitanda ne bibàsà bilenga bya kapelu ne bisanji bya orgues bilenga. Bambi beetu balongeshila bìmpè ku . . . Bàdi ne màpòlomè a bu-Docteur mu DL., Ph. D., LL.D., kadi tudi bapwè mwoyi ciine citùdi tunyeemena lubilu. Ki lutàtù ndwòlò alu. “Ndà, ùkambile bayiidi Bàanyi ne Ndi mubiike ku bafwè ne Nènkawilàngànè naabò mu Ngalèlà.” Tudi bapwè mwoyi mwakù wà ntandula awu. Tukàadi badifile ku bikwabo bintu, twibakangana ne ekeleeziya minene, twasangana ne màngumba, mu mushindu wà ne twapù ne mwakù wà ntandula mwoyi.

50 Myoyi yàbùngì mmisùngidìibwe mbwà didilongolola ku maalu ikalà mwa kwenzeka. Kùkaadi cikondo kampànda, bààkangambila ne mu Floride, mutangalaji wa malubà, bìrò bya mùdi kuulu kùmwèka, byàkafila dimanyisha ne kùvwa kùlwa mvùla munene wa cipùpù. Nenu muntu kampànda ùvwa mumunyi wa nzòlo ne mabata, ne yéyè wàkaya kùdi mwena mutumba nendè kumwambila ne kùvwa kùlwa mvùla wa cipùpù. Awu kubèngayè kucyàngata ne mushinga, kwambayè ne: “Macimbu’s wè!” Nenu kutùngunukayè anu nanku. Kààkatèèkakù nzòlò yèndè ayi kuulu to. Kààkayakù mu bwinà bwa kusokomena to. Kààkadyànjalakù kulongolola cintu nansha cimwè to. Kàdi mwena mutumba nendè yéyè wàkalongolola bintu byònsò. Kàdi byònsò, bya ewu wàkabènga kutwà mushinga didimwija adi awu, nzòlò yèndè yònsò yàkapweka ne màyi ne yàkafwà, nzùbu wèndè wàkashimbudiibwa, byàkudyà byèndè bìvwàye mulamè byàkajìmina, yéyè wàkabwela mu lùpitaadi. Biine byònsò abi anu bwalu kàakacyùka didimwija to! Ùvwa mumanyè ne mukenji wùvwa mufidìibwe, kàdi wàkapanga kucyùka mukenji.

51 Mushindu awu ngùdibi byenzèke leelu ewu, byenzèkèle bààbùngì bàà ku bantu beetu, yàbùngì ya ku ekeleeziya yetu. Tudi bamanyè ne Bible ùdi ùlongesha ne Yesu Kilisto ùdi umwèumwè awu makèèlèlà, leelu, too ne kashidi. Tudi bamanyè ne Bible ùdi ùlongesha, Yesu mwambè, mu Yone 14.12 ne: “Ewu

udi ungiitabuuja Mémè, nansha nanku, byenzedi bîNdi ngenza yêyè neabyenzè pèndè; yêyè neenzè byenzedi binène bitàmbe ne ebi, bwalu Ndi nya ku Taatù.” Mpindyewu twètù tudi badifile ku bintu bya cyanaàna, katùyi twangata didimwija to, katùyi tucyùka to. Tudi baasè lubilu, kadi katùyi tucyùka Mukenji to. Tudi bakütùle lubilu, kadi katùyi bamanyè cya kuya kamba patwàfikà kwòkò aku to.

<sup>52</sup> Kùkaadi ndambu wa matùkù kùdi ekeleeziya ya pa buloba ebu, ekeleeziya ya beena Kilisto mifikishìibwe ku bundù ne dipanga dya ngàsà, pàvwà musadidi wa kuneemekiibwa ne mumanya bîmpè ne wa ùciina Nzambi awu, Billy Graham, mufikishìibwe mpàla ne mpàla ne Bible. Ùvwa mwàsè lubilu, kadi mupwè mwoyi Mukenji; Mùzùlùmanyi awu pàakamwimanyinàye mumpàlà ne kumwambilayè ne: “Eci cyòci Dìyi dya Nzambi, tùmònèbi wèwè uCimwènèsha.” Ùvwa munyeemè bîmpè, matàbuluja manene, bintu binène. Kadi, pàakafikàbi ne ki bwalu mbwòbù ebu, yèyè kàvwa ne Mukenji to.

<sup>53</sup> “Ndi mubiike ku bafwè. Ndi umwèumwè awu makèèlèlè, leelu, too ne kashidi.” Bànyeema lubilu mu mubidi, ekeleeziya milenga, bidimba byàbùngi, màngumba manene, kadi aci kî ncyena-bwalu ciine to. Tàngilàayi cyàkalondà: “Ne bimanyinu ebi nebìfilè aba bàdi bìitabuuja.” Bàya, kadi kabayi bamanyè cya kwamba to.

<sup>54</sup> Kacya Nzambi kàtukù mutùme muntu Kàyi mumupèshe cintu cya kwamba to. Nzambi ùtu misangu yònsò anu ùshindika Mèyi Endè.

<sup>55</sup> Udi uya, kadi kùyi mumanyè mwa kwamba paùdi ufika kwòkù aku to. Matàbuluja èbè nansha miikàle manene bìshi, ekeleeziya webè nansha yèyè munene bìshi, anyi nansha dîngumba dyèbè ne bwenzeji kumutù kwa makwabo bìshi, wèwè kùyi ne cintu kampàndà cya kubàmbila to, cyùdi naaci ncinyi piikalàci kaciyi anu musumbà wà bantu basangile pàmwè cyenze bu diswa?

<sup>56</sup> Tudi ne Mukenji wà kwambila bantu ne: “Yesu ùdi ne mwoyi! Kî mmufwè to!” Kucyùka Mukenji!

<sup>57</sup> Mu ditùnga dinene ditùdi ne kusàkidila bwa bwalu bwàdi mpindyewu edi, États-Unis d'Amérique ewu, mu cimvundù cyàdi cinène cyònsò aci, mu maalu àdi ònsò a busenji awu, mu ngiikàdilù yàdi yònsò mibì ayi, dicidi anu ditùngà dya ditàmbe bunene pa buloba, ne anu ku cibangidilu kwàka, bwalu dyàkajaadikiibwa mu mushindu mujaalàmè. Kî ndyambùle Mukenji to.

<sup>58</sup> Kùkaadi bidimu byàbùngi, pàcìvwàdi mu bwànà bwàdi, bwalu-bulonda nyewu bùmvwila mu meeji ne, ba-Britanniques bàvwa bàswa kwangata bubanji busanga bwa ditùnga edi. Ne kùvwa cisumbù cya bantu bàvwà badisangishe ne

badifile ku mudimu, bènzè cinsentedi. Nenku kùvwa kabalù kiimàne kaswikila ku mwonji, ne mubàndi mudilongòlòle bwa kubàndapù ku kasunsa kanà kònsò. Cintu cya kumpalà cyàkapetàye cívwa ncimanyinu cya ne ba-Britanniques bàvwa bàlwa, ne yèyè úvwa wèla cibelu pa kabalù kèndè aku. Bívwa bifwànyine kwikala ne dikwàcisha kaayi kùdiye bwa kusalula kabalù kèndè aku? Bívwa bifwànyine kwikala ne dikwàcisha kaayi, bwa kutuuta kabalù aku mikàbà ne kuteeta bwa kuumuka mu ekeleeziya awu kuya ku Boston? Bívwa bifwànyine kwikala ne dikwàcisha kaayi kùdiye bu yèyè kàyi ne mukenji wà kwambila bantu? Mmunyì mùvwàbo bafwànyine kumanya mwa kudilongolola?

<sup>59</sup> Ba-Paul Revere bèètu ba bwena leelu mbanyeemè bilenga, kàdi, bôbò bàdi anu bànyeema cyanàànà, kakùyikù Mukenji nansha wùmwe to. Dìbà dikaadi dyakàne, dilwijakaja dikaadikù! Buloba bùkaadi ku ndekeelu! Ekeleeziya yàfikì mu katòngòbelà kàayi. Matùngà àfikì mu katòngòbelà kàawù. Nsòmbelu wa buntu wàfikì mu katòngòbelà kèndè. Maalu a mamanya àfikì mu katòngòbelà kàawù. Twètù twadivwijì malongolodi ne twenjì ekeleeziya minene, twàvwijì bayiishi beetu balwè bàà kapelu ne twabàtèeki pàmwe mu mubidi, mu mushindu wà ne mbamanyè mwa kwamba myakù yabo ya pa mwandà ne myambikila, ne mèyi a mukana mwàbò ne—ne màleetà àbò majikùke, ne byònsò anu mu byòbì mu maalu a nsòmbelu, bwa kupetangana ne bantu. Kàdi kì ng’aci cyàkambà Yesu to!

<sup>60</sup> “Mu Dìnà Dyànyì bôbò nebìipatè baadémons. Nebààkulè mu myakulu mipyamìpyà. Nyòka wa lulengu lwà lufù yèyè mubàsùme, kì ncifwànyine kubènzela bwalu to. Bôbò batentèkèle babèèdi byanza, babèèdi nebàsangalè.” Cidì cikèngelà bàà pa buloba mmùsànjeelà mwikàle ne Mukenji, bwa kwamba cintu kampànda, ne kumanya kùdi Mukenji wùfùmina ne nkùdi Nganyì kùdiWu wùfùmina.

<sup>61</sup> Paul Revere, pààkabàndàye pa kabalù kèndè aku, muntu wa bukìtù, muntu udi mu bwalu-bulonda pàdìbi anu ne kùdikù ditùngà dìdì ne cya kwikala dyena bwalu-bulonda bwine. Wàkènzela dibàndà dya pa kabalù dya mushinga mukole adi kuumukila pa bibàndilu bya ekeleeziya, ne mukenji wàkatàbulujà bantu bònsò awu, kuumukila anu ku uvwa mutàmbe kwikala mupèlè too ne ku uvwa mutàmbe kwikala mubanji, kuumukila ku cidimè too ne ku mwena kantu-ku-byanza ne: “Ba-Britanniques nya’ bìyee!” Nenku balwanganyi bàà mvità bàvwà kabàyi bàsàlaayi bàvwa bàdìlongolola bwa kubàbùndula. Nenku ditùngà dinene edi’s dyàkasùngidiibwa.

<sup>62</sup> Bumpyànyì bwa Nzambi ebu, cisàmbà cìdì Nzambi mufwile eci, Ekeleeziya udi ubiikidiibwa ku Dìnà Dyèndè ewu, bu yèyè ne cya kusùngidiibwa, bikèngela tùpetè mùsànjeelà mwikàle ne Mukenji wà ku Nkwasa wa butùmbi, bwa kuumusha kadyòmbò

kàà ditùkù edi aka. Kùdi Ngoliyààtà, kàdi ncyà bushuwa ne Nzambi neikalèku ne Davidi kampànda mu mwaba kampànda. Bikèngela tùfikè pa mwaba wà dipetangana. Bikèngela twikalè ne . . . Bikèngela twikalè ne Mukenji.

<sup>63</sup> Tudi twenda tuya, kàdi katùyi ne cintu nansha cìmwè cya kwamba to. Aci's cidi cijaadika bwalu, patùdi tukafika kaaba kaa ne ditunga anyi cisàmbà kampànda cidi cibènga kwitaba ne Yesu Kilisto ùdi Mwànà wa Nzambi aci, ne cìimana kumpalà kwa bambi beetu bàà leelu ewu bàdi batàmba kwelangana tudyòmbò aba. Ne pashìishe mu nsangilu wetù munene wa ekeleeziya, tusanganamù ba-Communistes batwè ku makumi asatu bambùle ne mikànda mu bidimu makumi abidi anyi makumi asatu, ya ne mbidimba bya kasumbù kàà cididi kàà ba-Communistes, mu ekeleeziya yetu misanga eyi. Citùdi mwa kwenza ncinyi? S'bidi bileeja ne mbanyeemè kabàyi ne Mukenji; bàsùmbisha makenji miine a bwanààbutè a ditunga, bàsùmbisha makenji a bwanààbutè a ciibidilu a Ekeleeziya.

<sup>64</sup> Byònsò byàyi koobeka ku diteetangana dya makànda. Mbikafikè ku ne Ekeleeziya mukese udi mwitabùùje Mukenji, ne mutwè makàsà ónsò abidi panshi awu, ne mèsù àbò mashindàmèene pa Nkùrusè, mu myoyi yabo dibìshiiibwa dya Yesu Kilisto, dilàkuka kapyà! Mbikafikè ku ne bikèngela matunga ónsò àWitabùùjè. Bikaadi ku diteetangana dya makànda. Kabyèna bikèmesha to mùdi maèkèleeziyà . . . Pàdi Nsangilu wa Maèkèleeziyà, ùkaadi mutùbula masòsò ne ci-Communiste, kabìyi bikèmesha to mùdìbò kabàyi mwa kwitabuuja citàmbe-mfùkulu. Kabìyi bikèmesha to mùdìbò kabàyi mwa kwitabuuja dyondopa dya kùdi Nzambi; kabàyikù ne Mukenji nansha wùmwè mu myoyi yabo to, nansha bòbò bànyeema bikolè bishi.

<sup>65</sup> Nyuma Mwìmpè Yèyè mubwelè mu mwoyi wà muntu, yèyè neitabuujè ne Yesu Kilisto mmubiishiiibwe ku bafwè, ne Ùdi ne mwoyi munda mwèndè, bwa kwenza, ne bwa kwenza diswa didiYe mulwe bwa kwenza; diswa, diswa dya Nzambi mu nsòmbelu wa muntu.

<sup>66</sup> Kàdi, lutàtù lùdi ne, twètù tudi twasa lubilu, tuya katùyi ne Mukenji to. Tudi twètù tuya ne tèòlòjì. Tudi tuya ne dyumvwija dya ekeleeziya dya Mifùndù dya mushindu kampànda.

<sup>67</sup> Bikèngela tùye ne dibìikà dya ku lufù! “Ndà, ùkambilè bayiidi Bàanyi ne Nèndongololè ekeleeziya mupyamùpyà” anyi? To, mukalenge! “Ndà, ùkambilè bayiidi Bàanyi ne Ndi mubiike ku bafwè, mùMvwà mwambè ne Nèmbiikè amu.” Ki Mukenji mutùmina Ekeleeziya mu dinda emu ngwòwò awu, wà ne Yesu kí mmufwè to. Ùdi ne mwoyi, ne munene ne wa bukolè leelu ewu anu mùvwàYe kwònsò eku amu.

68 Tukàadi bapetèpète mikenji yàbùngi ya madimwija, bwa kudilongolola, Paul Revere ne bakwabo bantu banene, ne mvità minene ne mvùlà ya bipùpù, ne bikwabo.

69 Pashiishe, Nzambi nyewu ùtùma kabidi Mukenji wà busàmbi. Ewu ki wùvwà Mukenji wà busàmbi.

70 Kùkaadi cikondo kampànda, pàvwàbo ne bya bupika mu Sud, ba-Boers bàlwa ne beena kalaba bàà mu Afrike wa ku Sud, batùdi tubiikila leelu ewu, ne, “mbantu bàà diikala” abu. Nenku bàvwa bàlwa naabo muneemu bàbàsùmbisha kùdi beena Amerike mu Sud, bwa kubàvwija bapika.

71 Mbajuukile kuulu pa bwalu abu mu Afrike leelu ewu bikolè, dishebeyangana, ne bikwabo, byènzekamù. Bàdi bàlwangana bwa budishikaminyi bwàbò. Bàdi ne bukenji bwa kucilwila mvità. Nzambi mmwenze muntu; muntu mmwenze bapika. Kacya kacivwakù ne cya kwikala nanku to.

72 Kwěnji ndambu wa bidimu, mvwa mu cipalu cya manàyi, anyi, mu nzùbù munene wa dibandila mpìngù ne bimfwànyi's wè. Mvwa ngenda nyùnguluka, mbandila bimfwànyi bishiilèshiiàngàne ne bikwabo, bwalu mèmè ntu nkaakala be bwa mpìngù ne bimfwànyi. Ndi ngeela meeji ne Nzambi ùtu mu mpìngù ne bimfwànyi. Ki mèmè kuseemena, e kumòna ne kùvwa muntu mukùlákàji wa Bafiike, ùvwa mukùlákàji anu wa menemene, ne makaaya makòbàme, mwikàle anu ne kajèngù kakese kàà nsukì lwà paanyimà pàà mutù. Ùvwa mwàsè cifulu. Ne ùvwa wàtwa eku wàtwa eku, ne cintu kampànda mu mushindu *ewu*, wènda ùkènzakana, byenzè bu ne ùvwa ùbandila anyi ùkèba cintu kampànda mu nzùbù wa dibandila mpìngù ne bimfwànyi awu. Mèmè kushààla mwimànyine pa bule mmubandila yèyè bwa katanci kakese.

73 Ki paanyimà pàà katanci yèyè kufika pa kashèètè kakese kampànda mwaba awu. Nenku yèyè kutàpamù disù, kadi kuzawukayè, ne mèsù èndè kubàlakanawù. Kutùpikayè cyànyimà kule ne kashèètè aku bwa katanci kakese, kuumushayè cifulu cyèndè cikese cya lutanda aci, kucikwàcilayè ku cyaanza. Ki mèmè kushààla mmubandila. Kadi mukùlumpè wa bafiike awu pààkiinyikàye mutù, binsònji kubangabì kumupwekela pa matàma. Ki mèmè kushààla mmubandila nkàcila, katanci ndambu.

74 Dìbà adi mèmè kudyàmbidila ne: “Nengǎnjibi kujandula ne cidì mukùlumpè ewu musalùkile nùнку ncinyì.” Mèmè kuseemena lwà ku *elu* luseke, ki kumwèkabì kùndì bu ne cìvwa mmùzàbì mutèèka muntwamu.

75 Ki mèmè kumutàngila pàvwàye mwimane mwaba awu awu apu. Ki mèmè kuseemena, kwamba ne: “Wetwàwu, mǎnsèbà!”

Ki yèyè ne: “Wetwàwu, mukalenge.”



76 Ki mêmè ne: “Mêmè ndi mwambi. Byàmpapùlù pângàakumònu wenza disambila mu ewu mwaba.” Mêmè ne: “Ndi mufwànyine kwela meeji ne wêwè ewu udi mwena Kilisto.”

Yèyè ne: “Ki cîndi, mukalenge.”

Ki mêmè ne: “Cyàkusalùlù bikole nanku ncinyi?”

77 Yèyè ne: “Vwilà kùneeku.” Ki mêmè kuya tàmàkàtàmàkà pàmwè ne mukùlumpè awu, too ne mwaba awu. Yèyè ne: “Udi umòna mùzàbì wàwa?”

Mêmè ne: “Eyowa’s, mukalenge.”

Yèyè ne: “Udi umòna dikeji dyàdya?”

Mêmè ne: “Eyowa’s, mukalenge.”

Yèyè ne: “Ela cyanza mu luseke lwànyì emu.”

Mêmè ne: “Awu mwaba wùdì mushilè ki cinyi aci?”

78 Yèyè ne: “Mukàbà wà bupika wùvwa munswikilapù, dîngà ditùkù. Ne *cyàcya* mmashi a Abraham Lincoln.” Yèyè ne: “Mashi èndè ngàakanguumushà mukàbà wà bupika awu.” Yèyè ne: “Aci kí ncifwànyinèkù kukusalula peebe anyi?”

79 Mêmè kushààla mwimàne kaaba aku nkàcila. Mêmè kudyàmbidila ne: “Piikalà mashi a Abraham Lincoln mafwànyine kusalula—kusalula mupika, bwa ne mmamuumùshe mukàbà wà bupika, ncinyi cìvwà Mashi a Yesu Kilisto mafwànyine kwenzela bantu bu mùdì Rosella ewu, uvwa mupika wa dikwàcika dya maalà; kungenzela mêmè ewu, mpùnga ne lufù, mwena dikènga mukèngeledi wa luse ewu?” Yèyè’s mmuumùshe mukàbà wà bupika bwa mpekaatu ku mwoyi wànyì. Kacìvwakù ne cya kusalula muntu anyi? Kacìvwakù ne cya kumufikisha ku didyùmvwa mushiilàngàne anyi? Kacìvwakù ne cya kumuvwija ne kaneemu pàdiye ùkwèlela meeji anyi? Kwèna mwa kumòna mucì kampànda kùyikù winyika mutù to, mbikolè, pàdì mumanyè ne Yesu wàkapikula mwoyi wèbè pa Mucì awu.

80 Patùdì tutùngunuka apa, katanci kakese, ne bwalu bwa bapika, ne bwa meeji ètù. Kwàkeediibwa dìyi kampànda dya patòòke, Dilekelediibwa dya ku bupika ku Dìyi dya patòòke adi, dyàkatwàbo cyàlà, ne bapika bàvwa ne cya kushààla badishikàmìne mu ditùkù kampànda. Kwèna mumanyè to, kaa, pawikalà kacya kùyikù mwanji kutuutakeena ne Kilisto to, kwènàku mumanyè musinga wùvwà cyòcì aci naawù kùdì bapika abu to. Pàakambiibwàdi, mukenji awu mu ditùngà dijimà, ne: “Nenùshaalè badishikàmìne mu ditùkù kampànda, pàdì bufùku bùcya. Nenùshaalè badishikàmìne. Kabyàkukèngela bwa nwènù kwikala kabidi nuvwàla mikàbà ya bupika ayi to, anyi kanwàkwikala kabidi nweediibwa mfimbù to. Kadi udi mudishikàmìne, ne wèwè udi mwena-mwàbò wa ditùngà dinene dya États-Unis edi. Kùcyèna kabidi mupika to,

paanyimà pàà bufùku bumanè kucya mu dinda kampànda.” Kaa, kushààlabò bindìle ne myoyi yizùka.

<sup>81</sup> Bu ngènzàmpèkààtù mwa kumònakù ciine aci’s wè! Bu ngènzàmpèkààtù mwa kuumvwakù Evanjeeliyo mulelèlè’s wè! Kì ndiya kashààla wa mu ekeleeziya kampànda to, kàdi diyiiisha dya Evanjeeliyo, bwa ne wèwè udi mwa kwikala musùùdìibwe ku mpekaatu, bwa ne wèwè udi mwa kwikala musùùlùdìibwe ku bubèèdì bwebe abu. “Pa dìbà kampànda,” ki dìbà dyùdì witabuujà ndyòdì adi.

<sup>82</sup> Nudi bamanyè’s, bapika abu bààkasaluka bikolè ne kushààlabò ne myoyi yizùka, bindìle dìbà adi òwàbò mwa kushààla badìshikàmìne, mu mushindu wà ne, mùdìbò bàndondela’s, bààkadisanga kwìnshì kwa kakùnà kampànda, baamaamù ne bânà bakese, kudìsangabò bònsò, ne bàmwè bàà ku bakùlákàjì. Kì kubàndabò too ne ku lusongo lwà kakùnà aku, pabwìpì ne mundankùlù. Bàvwa bamanyè ne pàvwàbò bùcyà ne dìbà dípàtuka, bàvwa bàshààla badìshikàmìne. Kabìvwa mwa kwangata ntántà wa mupìte cyàbìbìdì cimwè cya kasunsa dìbà kadiyi dikenkèshe ku lusongo lwà kakùnà aku to, kàdi bàmwè bàà kùdìbò bàvwa ku lusongo lwà kakùnà aku, bindìle, bindìle. “Kaa, pàdì anu dìbà dípàtuka, tudi tushààla badìshikàmìne.” Aci civwa m’-w-â-n-à . . . anyì d-ì-b-à.

<sup>83</sup> Kàdi pàjuukà M-w-â-n-à òm̀wè dya ku matùkù àdì panshì aa! Nèku pààkajuukà M-w-â-n-à kùkaadi bidimu bitwè ku cinunu ne nkàmà citeema, Yèyè wàkakòsa mukàbà ne mukàbà wònsò wà bupika, Wàkalekeesha mupika yònsò, Wàkondopa bubèèdì bwònsò, Wàkafila budìshikaminyi kùdì aba bàdì mu nkànù ya bupika. Mushindu mwine wuvwàbì bikèngela bwa twètù kubànda ne kwindilà’s wè!

<sup>84</sup> Nèku pààkapàtukà dìbà, dyàmbedi, muntu uvwa mutàmbe kwikala kuulu menemene awu, wàkadimòna, ne wàkeela lubilà kwìnshì kùdì muntu uvwa mulondèle ne: “Twashààdì badìshikàmìneee!” Ne muntu uvwa mulondèle awu wàkeela lubilà kwìnshì kùdì muntu uvwa kule kwìnshì kwa kakùnà ne: “Twashààdì badìshikàmìneee!” Too ne mwàkafikàbì mu citùdìlu ne: “Twashààdì badìshikàmìneee!” Bwalu, dìbà òwàbò dyènda dípàtuka, bòbò bàvwa bindìle, bindìle, bindìle dyòdì dìbà adi.

<sup>85</sup> Kàdi ambààyaaku tũng mutwàbèngà, leelu ewu, kwindilà M-w-â-n-à wa Nzambi. Tudi basùùlùdìibwe ku mpekaatu. Tudi basùùlùdìibwe ku nkànù. Tudi basùùlùdìibwe ku biibidìlu. Tudi basùùlùdìibwe ku òwàbò dya mfwankà, dya maalà, ku dípìcisha dya dìbà mu òwàbò dya maalà ne bisànkasanka, bwalu M-w-â-n-à wa Nzambi mmujuukè mu lukìtà ne mukòse lukànù ne lukànù lwònsò. Dipiila dyònsò ndiyè! Dìbànzà ndifucìibwe. Cibawu ncifucìibwe. Mpekaatu mmisukudìibwe, ne tudi badìshikàmìne. Kaa, tudi badìshikàmìne’s, balùmyànà!

Bupika anyi? Budishikaminyi, pàajuukà Mwânà wa Nzambi ne dyondopa mu mapwâpwâ Èndè!

<sup>86</sup> Dìngà ditùkù Yèyè neàjuukè mu Nkwasa wa butùmbi, àpinganè pa buloba. Nenku díbà adi netùsuuludiibwè ku mikenyi yònsò ya màsaamà ne ku mateeciibwa ònsò, basùlùdiibwe ku bìsaamà byònsò bya lufù ne cyònsò cidì cyènda pàmwè ne mwoyi wà cifwàkà, bwa kwikala ne mwoyi pàmwè Nendè kashidi. Netwikalè badishikàmine. “Ndà, ùkambè,” ki cintu cya dyenza ncyòci aci.

<sup>87</sup> Mu cikondo cya Bible, kùvwa kùlwa cidimu cya disànkà. Bantu bàvwà basùmbishìbwe bwa mabànzà àvwàbo babwelè, bàvwa babwelè dibànzà kàdi kupanga mwa kudifuta, nanku bàvwa bàya kadisùmbisha kùdi bantu, bu bapika. Nenku bìvwa bikèngela bwa kwikalabò bapika bààbò, bapika bàà mu nkànu, matùkù àbò ònsò a mwoyi. Kàdi, ku musangu ne ku musangu, kùvwa kùlwa ditùkù dya ngàsà, cìvwàbo bàbiikila ne ncidimu cya disànkà. Nenku pàvwà cidimu cya disànkà aci cìlwa, díbà adi kùvwa kùpàtuka mwakwidi wèla mpungi. Ne yèyè mpungi awu ùvwa wàmabila mupika yònsò, cikondo cikaavwàye mukwàte mudimu nansha ciikàle bule kaayi ne cikondo cìvwàye ne cya kukwàta kabidi mudimu nansha ciikàle bule kaayi, pàvwà mpungi awu ùdila, mupika awu ùvwa ùlwa mudishikàmine. Ùvwa mwa kulekelela lukàsù panshi ne kwalukila kumbèlu kùdi bàna bèndè. Kabìvwa bikèngela kabidi bwa kukwàtayè mudimu to, bwalu ùvwa mudishikàmine pàvwà anu mpungi wa cibìlù cya disànkà awu wùdila apu. Mpungi awu kàvwa ùfila mwadi mulubìdile to, kàdi ùvwa ùfila mwadi musungùlùke. Ne muntu ùvwa mwa kutèèka cyamu cyèndè cya mudimu aci panshi, kwalukila kwèndè kumbèlu musùlùdiibwe ku bupika.

<sup>88</sup> Mu dinda emu, Bible mmwambe ne: “Kadi mpungi yèyè ùfila mwadi mulubìdile, wàmanya cya dyenza nganyi?” Piikalàbi ne Bible mmuyiishè ne Yesu mmubiike ku bafwè, ne Ùdi umwèumwè awu makèlèlè, leelu, too ne kashidi, kàdi mpungi yitùdi tuumvwa yèla leelu ewu yàmba ne, “Matùkù a bishimà àkaadi mamanè kupìta, cintu pààci ne ndyondopa dya kùdi Nzambi kacyènakù to,” mbanganyi bààmanya mwa kudìlongolola?

<sup>89</sup> Cidì citùkèngelà leelu ewu mbaamisànjeelà beela maanyi bàà kùdi Nzambi! “Yèyè mmubiike ku bafwè! Yèyè ùdi umwèumwè awu makèlèlè, leelu, too ne kashidi!” Ki Mukenji wà ditùkù ngòwò awu.

<sup>90</sup> Kaa, nkulwè mikenji minene, kàdi Paasàkà mmuyibwikìdije yònsò! Mikenji minene; Paasàkà nguvwa yònsò ayi! Pàvwà bafwè...didìlongolola ndyenjìibwe bwa ne mwena lukunà wa ndekeelu...Tukààvwakù bamòne mabèèdi mondòpiibwe mu Dipungila Dikùlukulu. Tukààvwakù bamòne bishimà byenjìibwe mu Dipungila Dikùlukulu. Kùvwakù bikèenà-

kumòna bilwè mu Dipungila Dikùlukulu. Kàdi muntu yònsò ùvwa ùya buludì ku lukità, ùdikonka ní wàdyàkujuukakù kabidi. Kàdi mu dinda dya Paasàkà adi, bayiidi aba pààkapetàbo Mukenji mutàmbe bunene ùvwàku muntu kanà yònsò ewu mufwànyine kupeta, cyàkapetàbo ncinyi? “Ndà, ùkambilè bayiidi Bàanyi, Ndi mubiishiiabwe ku bafwè!” Lufù lwàkacìmunyiibwa!

<sup>91</sup> Kacya pa buloba apa kakùvwakù muntu, mupròfetà, muntu munene, muntu musantwisha nansha umwe uvwakù mwa kucimuna. . . Bávwa mwa kucimuna mabèèdi ku Nyuma wa Nzambi. Bávwa mwa kucimuna cikondo, ku Nyuma wa Nzambi, ne kudyànjila kumòna maalu àcìvwà àlwa. Bávwa mwa kucimuna byòbì abi. Kàdi kacya kakùvwakù muntu mulaaba ne dilaabiibwa dya kùdi Nzambi, uvwa mwa kwamba diyì edi to, dya ne: “Ndi mwa kutèèka mwoyi Wànyi panshi, Nèngwängätùlùlè. Shimbùlaayi mubidi ewu, Mémè nèngùjuulè mu ditùkù diisátù.” Kacya kakùvwakù muntu uvwa mwa kwamba diyì bu nanku to. Ne bávwa bàdikonka munda mwa myoyi yabo bwalu ebu ní bùvwa bulelèlà anyi kabùvwa bulelèlà.

<sup>92</sup> Kàdi mu dinda dya Paasàkà, bààkapeta Mukenji ne: “Ndàayi pa buloba bujimà, nùkayiishè cifùkiibwà cyònsò Evanjeeliyo. Ndi mubiike ku bafwè. Mònaayi, Ndi neenu misangu yònsò, mene too ne ku mfùdiilu kwa buloba. Ewu udi wìtabuuja ne ùbàtijiibwa neàsungidiibwè, ewu udi kàyì wìtabuuja neàpiishiibwè. Ne bimanyinu ebi nebifilè aba bàdi bìitabuuja: mu Dinà Dyànyi bòbò nebiipatè baadémons; nebààkulè myakulu mipyamipyà; bòbò bakwàte nyòka ne byanza anyi banwè bintu bidì bishebeyangana, kabyàkubènzela bwalu to; bòbò batentèkéle babèèdi byanza, babèèdi nebàsangalè.” *Mukenji Wà Paasàkà*, ki wùmwe wà ku mikenji ya mitàmbe kwikala yà pabwàyi yidìku. Lufù lwàkacìmunyiibwa!

<sup>93</sup> Nyewu tuvùluka mucìmunyi kampànda. Napoléon, mwikàle ne bidimu makumi asatu ne bisatu, wàkacìmuna buloba bujimà. Wàkacìmuna buloba bujimà, kucìmuna ditùngà dyònsò ùvwà dikèngelà kucìmuna adi. Kàdi wàkatekeshiibwa mu mabòkò bikole bwalu kakùcìvwa kabidi muntu nansha umwe wa kulwanganayè nendè to, kusòmbayè panshi e kwasayè mwadi. Kakùcìvwa kabidi muntu nansha umwe wa kulwanganayè nendè to, kàdi wàkanàya dinàya kàyì ùlonda mikenji yaadi to. Bandumbà binunu makumi bávwa bènda bàlonda cilwilu cyèndè, yèyè ùvwa ùya ne cingoma ne mwelè wà mvità. Mwikàle ne bidimu makumi asatu ne bisatu, yèyè ùkaavwa mucìmunè buloba bujimà. Pèndè yèyè's ùvwa musangu kampànda mukàndiki munene wa maalà a kapyà, kadi wàkafwà mukwàciki wa maalà a kapyà wa ùsùkwila ne mu bilàmbà, bwalu ùvwa ùnàya kàyì ùlonda mikenji ya dinàya to. Ùkaavwa mupwe mukenji mwoyi. Ùvwa mukwàtàngàne ku bukòokeshi bwèndè,

kàdì ùvwa mupwe mukenji mwoyi. Wàkaya, kadi kupwaye mwoyi ciine civwàye ùyiila.

<sup>94</sup> Anu mùvwà mwânà mukese wa balùme wàkanyeema lubilu lwà ditembangana awu, anu mùdi ekeleeziya ùnyeema leelu ewu emu, anu mùdi bantu bàdi bànyeema aba, anu mùdi ditungà dìnyeema emu! Cyetu cinyeemenu kî mbômbè ya mushindà nansha, cyetu cinyeemenu n'Yesu Kilisto ne dibiiikà Dyèndè dya ku lufù.

<sup>95</sup> Napoléon ùkaavwa mupwe mwoyi cintu cya mushinga. Cyàkamwenzekelà ncinyi? Wàkafwà mucimùnyìlbwe anu kashidi, kanwàyi. Bwa cinyi? Kààkanàya dinàya mu dyòdi to, nansha mwàkacimunàye buloba amu, mu mubidi emu. Ùvwa mulongòlòle cilwilu. Ùvwa mùsàlaayi wa meeji mapitèpìte, mwangàte ditungà ne ditungà dyònsò ne mwenzè bintu (bìvwàye) bìvwà muntu mukwabo nansha umwe kàyikù mwenzè anyi mufwànyine kwenza to, bu yéyè, kàdi yéyè wàkapwà mwoyi civwà mukenji mulelèlà. Wàkacyàngata, nenku kupetayè dikàndà dyèndè dya búsàlaayi adi, kàdi kupwàye mwoyi dikàndà dya Mukalenge.

<sup>96</sup> Dikàndà dya Mukalenge ki bwetu busàmbi. Katwènakù ne dikwabo dikàndà to. Mèmè ncyèna ne cinyeemenu cikwabo to, nansha cimwè! Nzambi ikalèku naanyi luse! Wàngatè mwoyi wànyì, kàdi kùndekèdìku mpwà mwoyi kùdì dikàndà dyànyì difùmina to. Didi difùmina kùdì Mukalenge! Ncyèna mèmè njiinga bintu bilenga bya pa buloba abi to. Ndi muswe Yesu, ndi muswe dibiiikà Dyèndè dya ku lufù diikalè dilàkuka kapyà mu nsòmbelu wanyì.

<sup>97</sup> Mushindu mwine wùvwàbi bishiilàngàne ne Yesu Kilisto wa bidimu makumi asatu ne bisatu awu's wè! Mwikàle ne bidimu makumi asatu ne bisatu, Yesu ùvwa mwena bintu byònsò; Yéyè ngwàkafùka buloba. Ne Yéyè ùvwa pa buloba, kàdi bàà pa buloba kabààkaMumanya to. Kacya Yéyè kààkaDikèbelakù dimanyika to. Kààkakùngwijakù bàsàlaayi to. Kààkalongololakù maèkèleeziyà to. Kààkakèbakù nguumu minene bwa Yéyè mwine to. Kààkapàtukakù ne màpòlomè a dilongesha, a tèlòlòjì, ne bikwabo bya kuditàmbisha naabi to, kakùyikù mulubù wà ne Yéyè ùkaavwakù mubwelè mu kàlaasà kampàndà kàà tèlòlòjì to. Kàdi Yéyè ùvwa ne Nzambi. Ùvwa ne Nzambi. Kadi ne bidimu makumi asatu ne bisatu, Yéyè ùkaavwa mucimùne démon yònsò uvwa mupàtùle mutù wèndè mu iferno muwùtādìke muulu. Wàkacimuna mabèèdi. Wàkacimuna miitabuuja a màjimbù. Wàkacimuna baadémons. Wàkacimuna lufù. Ne pààkafwàYe pa nkùrusè, Wàkapweka mu ciinà civwà kaciyi ne ndekeelu cya iferno, wàkacimuna iferno.

<sup>98</sup> Nenku mu dinda dya Paasàkà Yéyè kucimuna lukitá. Bwa cinyi? Yéyè wàkanàya dinàya adi anu bilondèshile mikenji mu yòyi, wènda ùnyeema ne Mukenji. Ki civwàYe, kwasaYe

lubilu e kuya! “Ndà.” Nzambi kuMutùma, ne Yèyè ùvwa ne Mukenji wà kubàmbila. Ne mwikàle ne Mukenji wùvwa Nzambi muMupèèshe, kucimunaYè makolè a Sàtaanà. KucimunaYè mabèèdi. KucimunaYè lufù. KucimunaYè iferno. KucimunaYè lukità. Bwa cinyi? Yèyè wàkaya! “Ndà, ùkambè!” “Mémè ntu ngenza misangu yònsò anu cidi Taatù Wanyì ùNgambila bwa kwenza. Ncitu ngenza cingà cintu to anu cidiYe ùNgambila bwa kwenza.”

<sup>99</sup> Pashiishe kumpalà kwa kufwàYe, Wàkamba nunku ewu: “Anu mùdi Taatù muNtùme Mémè, ki mùNdi pàanyi nnùtùma.” Kabiya bwa kwibaka bantu ku dikàndà dya búsàlaayi to; kabiya bwa kupicishila dībà dyebe dyònsò mu bya ne wíkala Mfumu wa ditungà nganyi to. Aci ncifwànyine kwikala cya mushinga, kàdi kí ncyà mushinga mu *Eci* nansha. Bwa buloba kaayi bùkaadi butùuke. Tudi ne Mukenji wùmwèpelè, wà ne, Yesu Kilisto mmubiike ku bafwè, ne Ùdi umwèumwè awu makèlèlèlè, leelu, too ne kashidi.

<sup>100</sup> Makèlèlèlè awu, mu kaacibambalu kakese kàà ku tubàdi, bàvwa bàteeta bwa kungambishisha cintu kampàndà cívwa kaciyi cya bushuwa to. Mémè kwamba ne: “Mémè ncyèna mucinguludi wa mfrangà ya bendè to.” Mémè ne: “Mémè ndi—ndi ne meeji matòoke. Ne nwènù kanwèna mwa kwamba kabidi cingà cintu to anu ne aci mbulelèlè.”

<sup>101</sup> Ki muntu kampànda ùvwa naanyi, kwambayè ne: “Bu muntu mwa kwakulakù naanyi mushindu awu, s’ndi mufwànyine kudyumvwa anu bu wa kumwasa mukàndà.”

<sup>102</sup> Mémè ne: “To, mukalenge. To, aci kí ncimpè to. Awu kí mmushindu wà kuya ne bwalu abu to. Kí mbimpè to.”

<sup>103</sup> Yèyè ne: “Ee, bwa cinyi kùyikù umanya ne bintu ebi mbidi byènzeka? Bwa cinyi kùyikù upàtuka kwàka wenza cyòci eci?”

Mémè ne: “Ndi mpicishila dībà dyànyì ku dikwàcila Yesu Kilisto mudimu.”

<sup>104</sup> Éyi Nzambi wa yààya, kaa, bantu mbampofu ne kabàyikù mwa kucimona to! “Anu mùdi Taatù muNtùme Mémè,” Taatù wàkaMutùma, Yèyè kuya. Ùvwa ne Mukenji wà kwambila bantu. Ne mu dībà dya lufù, Yèyè wàkacimuna lufù ne Wàkacimuna iferno, ne Wàkacimuna lukità. “Anu mùdi Taatù muNtùme ne Mukenji, Mémè ndi nnùtùma ne Mukenji; kaciyi bwa kwibaka maèkèleeziyà, malongolodi to, kadi ndàayi pa buloba bujimà nùkaleejè patòoke Bukolè bwa Nyuma Mwimpè. Bimanyinu ebi nebifilè aba bàdi biitabuujà; mu Dìna Dyànyì bóbò nebipatè baadémons, nebàakulè myakulu mipyamipya, nebàkwatè nyòka ne byanza.” Nenku pàdi mibidi yetu yiya mu lukità, mwàkayàYe Wèndè amu, Yèyè mmucimune byònsò lufù, iferno, ne lukità. Yèyè m’Mucimunyi wa bukolè.

<sup>105</sup> Yèyè ùdi ùtùtùma ne Mukenji Wèndè. Tùyaayi ne Mukenji awu, tuya ne cintu kampànda cya kwambilangana. “Ndàayi,

nùkambè!” Kí nkwasá lubilu kàdi pashìishe kupanga mwa kwamba to; twánjààyi kuCìbweja dyàmbedi mu mwoyi wètù twètù biine.

<sup>106</sup> Paùdi ulwa bwa kukusambidilabò, mu dinda emu, kùlu bu ku mpùùkàpùùka to. Lwâ ne Mukenji munda mwa mwoyi wèbè ne: “Ndi Ewu uvwa mufwè, kàdi udi cyàkàbìdi ne mwoyi awu. Ndi Ewu wàkafila Mukenji ne, ‘Bimanyinu ebi nebifile aba bàdi bìitabuuja.’” Pìikalà Nzambi wa Bukolè bwònsò ne bukolè bwa kwangata mwànà mukese wa—wa mèsù a bulèngù ne kwaluja mèsù èndè mùdi a bantu bònsò aa; Nzambi’s ùvwa ne bukolè bwa kwangata mwànà, mwànà wa mu dibòkò wa balùme, kàyikù mwanji kumòna kacya bààmulela, mwikàle ne bidimu dikumi ne bisambombo, kumwalujulwila lumòndò; Nzambi’s ùdi ne bukolè bwa kwangata muntu mukèngeledi wa luse mukèngi mudyà kùdi kànsèrè kùle tètè mu yèyè. . .

<sup>107</sup> Ne bwalu Mukenji ngwà cya bushuwa, bwalu Nzambi mmutùme Mukenji, bwalu Nzambi mmutùme mùsànjeelà, kakùyi mpàtà to cingoma cyònsò cya mu iferno neciikalè cìmwasa anu yèyè. Ncya bushuwa ne, yèyè neàtetukè ne neàdishindè, àjuukè kuulu ne àkupè mutù, ne àtungunukè ne kuya. Twètù tudi ne Mukenji, kakwèna cyàWimanyikàku to! Aleluuyah! “Pa lubwebwe elu Mémè nèngiibakilèpu Ekeleeziya Wanyì, ne biibi bya iferno kabyàkuMutàmbakù bukolè to.” Bòbò bàdi mwa kwamba cidìbo baswè kwamba, kwenza cidìbo baswè kwenza, dyabùlù ùdi mwa kufuuna kutwà bikèmu. Kàdi Yesu mmubiike ku lufù, Ùdi ne mwoyi munda mwetu leelu!

<sup>108</sup> Kùkaadi matùkù ndambu, mvwa nyiikilangana ne Docteur munene Lamsa, udi mukùdimùne Bible kuumusha mu ci-Araméen, kutùma mu Anglais awu. Nenu mvwa mumòne kamanyinu kakese aku, kamanyinu kàà Nzambi mwaba awu, kiikàle ne tutobà tukese tusatu munda. Mémè kwamba ne: “Docteur Lamsa, ncinyi aci?”

Yèyè ne: “N’Nzambi, mwikàle ne byambiùbwà bisatu.”

<sup>109</sup> Ki mémè ne: “Udi muswe kwamba ne, Nzambi musòmbèle mu midimu yisatu, bu mùdi, Taatù, Mwànà, ne Nyuma Mwimpè anyi?”

<sup>110</sup> Kubàndulukayè e kuntàngila, bisònji kutèngelabì mu mèsù a mwena Yuda awu, yèyè ne: “Udi witabuuja aci anyi, Mwanètù Branham?”

Mémè ne: “Ne byònsò bìdi mu mwoyi wànyì.”

<sup>111</sup> Kungeelayè mabòkò kunshìngù, kwambayè ne: “Mvwa mudikonkè pàmvwà mumòne bintu binène abi byènzeka, ne bimanyinu byúvwà wenza abi.” Yèyè ne: “Bàvwa bangambile ne wèwè ùdi mupròfetà. Ncìvwa mucitàbùùjekù to, anu mpindyewu. Ngààmányi mpindyewu ne ki cyùdi.” Yèyè ne: “Kì cyòci! Kì Mukenji ngwòwù awu. Kì cintu cyànyùkushà Bukalenge bwa Nzambi ncyòci aci.” Eyowa. Yèyè ne: “Dìngà

ditùkù wadyàkufwà bwa bwalu abu, mulùmýànà.” Yéyè ne: “Neùtwe citampì ku bujaadiki bwebe ne cyôci cintu aci.”

<sup>112</sup> Umwe wa ku bantu bàà batàmbe bunene batùdi naabò’s, pàdi Eisenhower ne bantu banene bàà pa buloba, bàà mu Hollywood, bantu bàdi bendè luumù bàà nsèndèmâ bàà mishindu yònsò bàmubiikidisha yéyè, kàdi mukàlame anu mu disangisha amu. Yéyè ne: “Ndi mwenzè bidimu makumi asatu ne bya mu njila, ngenza anu dikùdimuna edi, nciyi nguumushila ku cyena Ngelika cya ku Vatican to, kàdi ku ci-Araméen; nguumushila anu buludi ku cyôci aci, ku ci-Araméen, ntùma mu Anglais.” Ki yéyè ne: “Ndi mwangate ntàntà yònsò awu,” yéyè ne, “ngàshiishi kubwela mpindyewu mu mwaba wùndi mmòna Nzambi wa Bible, ùkwàta mudimu.” Yéyè ne: “Udi mumanyè’s, Mwanèètù Branham, tudi mwa kumòna bimanyinu ne maalu a kukèma, kàdi tudi tutàngila ne n’Diyi kaayi didi naadi ciine cimanyinu aci. Twètù beena Yudà, tudi tumòna cimanyinu kampànda, kàdi tudi tutàngila Dìyì dya cimanyinu.”

<sup>113</sup> Kaa, aleluuyah! Dìyì dya cimanyinu’s! Nzambi wàkambila Mòsà ne: “Bòbò kabàyi baswè kutèeleja Dìyì to, Dìyì dya cimanyinu cya kumpàla, dībà adi nebàteelejè Dìyì dya cimanyinu ciibidì.” Bwalu kì mbutàmbe kwikala bwa cimanyinu to, kàdi Dìyì divwà dyènda naaci adi.

<sup>114</sup> Nudi numòna ne, mwena Yudà awu, yéyè’s ùvwa mumanyè cìvwàye wàmba aci. Kwambayè ne: “Nkààdikù mumònemòne majingulula, nkààdikù mumònemòne bimanyinu, maalu a kukèma, bampofo bòndopiibwa, ne bimanyinu bya mishindu yònsò, kàdi mèmè kudikonka, kàdi ndi mmòna mpindyewu Dìyì didi paanyimà pàabi ne kadyàkukòsolola Nzambi mu bitùpà bisatu, dyàmba ne: ‘Yéyè ùdi Nzambi umwèpelè, Taatù, ne udi mulondèle, Mwànà, . . .’ Yéyè ùdi wàmba ne: ‘Nzambi ùdi Nzambi: byambìwà bisatu bya Nzambi; midimu yisatu ya Nzambi.’” Yéyè ne: “Aci’s cidi cìcishindika.”

<sup>115</sup> Kaa, mwanèètù, twètù’s tudi ne Mukenji! “Ndàayi, nùkambilè bayiidi Bàanyi! Nciwva ewu uvwa mufwè, ne *mukwabo* udi pabwìpì menemene ne lufù, ne *mukwabo* udi ne mwoyi to. Ndi Ewu Uvwa, Udi, ne Wálwa Awu; Muji ne Mùtòlokù wà Davìdi; Mùtootò wà mu Dinda wùdì Wùkenkà awu.” Eyowa!

<sup>116</sup> Bidi ne dikwàcisha kaayi bwa kuya, bwa kuya, pawikalà kùyì ne cintu kampànda cya kwambilangana? Tudi ne cintu kampànda cya kwambilangana, ncyà bushuwa: “Yesu Kilisto, Mwànà wa Nzambi, mmunùngè bònsò. Wakafwà bwenu nwènù bònsò. Nangàayi Yesu Kilisto, Mwànà wa Nzambi awu.”

<sup>117</sup> Mbanganyi bàkaadiku babwelè mu masangisha, ne bamòne bimanyinu binène ne maalu a kukèma bya mmwènekeli Wendè—Wendè, bya mùdìYe ùjingulula ne ùleeja, ne bikwabo? Ki Nzambi wa mu Dyulu n’Yéyè awu, Udi mubiike ku bafwè awu.



118 Bivwa bikèngela nwênù kumòna cimanyinu cya cimanyinu cyàCì cya mu cyena Ebèlù. M'Bukènkè, mùdi Dikunji dya Kapyà, ne munda amu mwikàle tumanyinu tukese tusatu, Taatù, Mwànà, ne Nyuma Mwímpè, civwà kacyi bapersona basatu to. Cìvwa n'Nzambi umwèpelè mwikàle ne mwoyi mu midimu yisatu. Nzambi anu umwèumwè awu! Aleluuyah! Nzambi kumutù kwenu, Nzambi neenu, Nzambi munda mwenu. Anu Umwèumwè awu ùDìpwekesha milongo, ùsukula Ekeleeziya Wendè, bwa kumònaYè mwa kwikala ne mwoyi. Paùdi wèwè uMukòsolola tutùpà tutùpà, ne utèèka kàmwè *apa*, ne kàmwè *apa*, kàmwè *pààpa* apu, s'mbumpàngaanù anu bwetu bwa cya bushuwa ebu.

119 Mémè ndi ngiitabuuja dibìikà dya Yesu Kilisto ku lufù, mubiike ku bafwè. Ne Yèyè ùvwa Muntu umwèpelè uvwa mwa kwamba ne: “Makolè ònsò mu Maulu ne pa buloba mmafidiibwe mu cyanza Cyànyì. Makolè ònsò mu Maulu ne pa buloba mmafidiibwe mu cyanza Cyànyì. Ndàayi pa buloba bujimà, nùkayiishè cìfùkùibwà cyònsò Evanjeeliyo.” Evanjeeliyo kàakalwa anu mu mèyi nkàayaawù to, kàdi ku bukolè ne dileeja dya patòòke dya Nyuma Mwímpè. Nzambi ànùkwàcìshèku bwa kwitabuuja ciine aci, Nzambi ànkwàcìshèku bwa kwitabuuja ciine aci, nenku netùmonè Yesu dǐngà ditùkù.

Pààjikà midimu mikolè ya pànwapa, ndekeelu wa byònsò netùmonè Yesù;  
Pa Nkwasa Wendè wa butùmbi mulenga awu  
Yèyè neàngaakidilè Kumbèlu,  
Paanyimà pàà ditùkù dimanè kujika. (Ncya bushuwa.)

Nsenga yàkùpudiibu mu bidyacilu bya makàsà  
Bya Mwenyi wa ku mwelelu wà màyi a Ngalèlà  
aku.

120 BààkaMushebeya bwalu Yèyè ùvwa ùDìvwija Nzambi, ne Yèyè ùvwa Nzambi. BààkaMukùdika, bwalu, Yèyè's wàkafwà ku dinyooka dya lufù. Ki bwa cinyi mémè ncitu ngiitabuuja dinyooka dya lufù nansha. Yesu wàkafwà ku dinyooka dya—dya dinyooka dya lufù dya kùdi bukalenge bwa cìnsangànsàngà bwa Loomò. Dinyooka dya lufù, òvwa dya ne, kukùdika muntu ku nkùrusè. Yèyè wàkafwà ku dinyooka dya lufù, bavùùle bilàmbà Byèndè pambidi, ne kuMukùdikabò kuntu aku, kuMufwìshabò bundù, nenku kufwàYe mu mushindu awu. Kàdi Nzambi wàkaMubiisha ku lufù mu ditùkù diisàtù!

121 Ne twètù tudi bantèmù Bèndè. Kàdi patwìkalà twètù katùyi tuMutwà nyama ku mikòlò to, wàMutwà nyama ku mikòlò ki nganyi?

122 Muntu kampànda kutwìlanganayè naanyì ditùku adi, wàmba ne: “Kaa, Mwanèètù Branham, kwàmbikù to. Lekèlà kwamba. Udi—udi utàpa bantu bakàji ku mwoyi, bwa mùdibo ne

nsuki mípì, ne mùdìbo bènza *bikampànda* ne bènza *bikansanga*, ne bikwabo bya mushindu awu abi.”

123 Mémè kwamba ne: “Mémè ncíyi mbàmbila to, wabàmbila nganyi? Wacyàmba nganyi?”

Yèyè ne: “Ee, s’udi ufiikisha bayiishi abu munda.”

124 Mbipicìibwe ne mubàfikishe bóbò ku dimfiikila munda, pamutù pàà Yèyè. Ki Bulelèla. Ncya bushuwa! [Katùpà kàà mukàbà wà méyì munda mutupù—Muf.] Cya bushuwa. Wacyàmba nganyi? S’bidi bikèngela bwa muntu kampànda kucyàmbayè.

125 Yesu mmwambè ne: “Ndàayi, nùkambè. Ndàayi nùkambè, nùkambilè bayiidi Bàanyi ne Ngǎbìiki ku bafwè. [Katùpà kàà mukàbà wà méyì munda mutupù—Muf.] Mònaayi, Ndi neenu misangu yònsò, too ne ku ndekeelu kwa buloba mene.”

126 Nudi nwitabuuja nanku anyì, nwènù balundà bàanyi?

Tùsambilàayi, patùdi twinyika mitù yetu mpindyewu bwa disambila apa.

127 Éyi Taatù Nzambi! Bulelèla: “Ndàayi, nùkambè. Ndàayi nùkambilè bayiidi Bàanyi ne Ngǎbìiki ku bafwè.” Nenku Taatù Nzambi, Wèwè kwàkambila anu bayiidi Beebe cyanààna to, kàdi Wákabàjaadikila ne Uvwa mubiike ku bafwè. WàkaDìleeja Wèwè mwine mwikàle naabò, ne kwenza menemene anu muWàkenzà kumpàlà kwa Wèwè kufwà amu. Bidimu cinunu ne nkàmà citeema mbyebi byàlu ne byàpici, Mukalenge, Mukenji ngwewu wùcidi anu wùteema. Wùdi wùkenka ne wùteema mu moyi yetu leelu anu mùvwàbi bwa bayiidi abu amu, bwalu nyewu tumòna Mukalenge mubiike ku lufù munkaci mwetu mene, wènza bintu byàkenzàYe kumpàla abi. Tudi bamanyè ne Yèyè mmubiike ku bafwè.

128 Paasàkà ùdi ne mushinga wàbùngì kutùdi, bwalu twàbwedi peetu mu mulongo awu ne tusànkila bwobùmwe bwa Dibìikà dya ku lufù adi. Bwalu tùvwà bafwè musangu kampànda ku mpekaatu ne matomboka, mwàkenzà mwànà mutùùlavi wa mfrangà awu, kàdi mpindyewu twàpecì ngàsà, ne Nzambi wàtùfwidi luse ku mpekaatu yetu. Yèyè wàtùpèeshi kabidi Citampì, mwàkapèèshàYe Taatù Abraham, bwa kushindika ne Wàtwitàbi. Taatù Abraham ùvwa wàmba ne ùvwa mwitabùùje Nzambi, kàdi Yèyè wàkamupèèsha citampì cya ditengudiibwa bu cishindikila cya ne yèyè ùvwa muMwitabùùje. Nenku mpindyewu, Taatù, leelu tudi batengula kùdi Nyuma Mwimpè, bintu byònsò bya pa buloba byàpweki ne màyi. Tudi ne kiipàcilà kàmwèpelè: kuKukwàcila mudimu. Tudi ne dijinga dimwèpelè: kuKunanga, kwikala muyiidi Webè.

129 Nenku mpindyewu, Mukalenge, ndi ndòmba bwa Wèwè kushindikila mwoyi wònsò kaadiyiisha kakese kakòsòlòke aka. Kakàbàpicikù to. Bàmonèku ne Wèwè udi umwèumwè awu

makèèlèlè, leelu, too ne kashidi, ne Wèwè udi kaaba aka, mubiike ku bafwè, ne neushaalè nanku too ne—ne pàadisangà cyàkàbidi Nyuma ne mubidi ku Dilwa dya Cyàkàbidi.

<sup>130</sup> Ndi ndòmbakù bwa babèèdi bàdi kaaba aka aba, Taatù, mu dinda emu. Nyewu mpindyewu, mu dinda dya Paasàkà edi, ngàtèèki ku luseke (anyì, kî nne ngàtèèki ku luseke to, kàdi ngàtèèki anu bwa katanci kàà díbà cyanàànà) mapà aÙdi mumpèèshe, bu mùdi dijingulula. Pa buloba, mémè nkàadi muyààyaàye mu matùngà mwalùkile, Mukalenge, bôbò bônso mbacimanyè. Mpindyewu ndi ndòmba, ne, Mukenji w'Ùdi mumpèèshe mu diitu emu ewu, ne, kùkaadi ndambu wa matùku, ne, pa bukòlè bwa difùka bùdi búsanganyibwà mu ekeleeziya ewu mu dinda emu abu, cisàmbà ciine cyàkafùkiibwàpu aci, ndi ndòmba, Nzambi, pànkaadi ndwa bwa kutentekela babèèdi byanza mu dinda emu apa, pàmwè ne bânà beetu bàà balùme aba kaaba aka, bwa Ùpwekelèku ekeleeziya ewu mu dinda emu, ne luse, ne Wòndòpèku bantu, mu mushindu wà kakùciyi muntu wa butekète nansha umwe munkaci mwetu pìikalà disangisha edi dijikè to. Muntu ne muntu wa kùdibo àbeneshiibwèku ne òndopiibwè.

<sup>131</sup> Tudi bamanyè, Mukalenge, ne kakwèna cintu citùdiku twètù mwa kudyènzela to. Cidi ndiitabuuja dipwekèle dya bwànà, biikàle twitabuuja. Tudi mwa kumòna bayiidi paanyimà pàà bôbò bamanè kupèèshiibwa bukòlè bwa kwondopa babèèdi ne, bàakaya ne bàakacimunyiibwa mu bwalu bwa disaamà dya ciseki; bèèla mbilà mikòlè ne bàdila myadi, pàmwàpa, ne bàtùpika bàya muulu bàalukila, bàteeta kwenza bwa démon awu kuumukayè. Kàdi pàakatwilanganàye ne Yesu, kaa, dishiilanga kaayi's we! KwambaYè ne: "Wèwè nyuma mubi, pàtukà munda mwèndè." Dishiilangana kaayi's wè! Kaa, kumanyayè ne awu kàvwa mmupostolo to. Ùvwa m'Mukalenge Yèyè mwine. Ki nyuma awu kunyùkusha mwànà wa balùme awu ne kumubyànkulayè panshi. Kàdi Yesu wàkamba ne: "Kî mmufwè to. Mujuulàayi anu cyanàànà nùmupèèshè cyàkudyà." Nyuma mubi awu's wàkuumuka.

<sup>132</sup> Éyi Yesu, WèWè Mwànà wa Nzambi, lwàku cyàkàbidi, wèlè Ekeleeziya Webè maanyi bya bidipòngolokela, ne dyuja dya tètè, ne bukòlè. Swàku bwa Nyuma wa Yesu udi mubiike ku lufù mwikàle ne mwoyi awu àbiishè kaèkèleeziyà kakese aka ku lufù mu dinda emu àkàbwejè mu diitabuuja dipyadiya, bukòlè, bukòlè bwa diitabuuja, bwa twamònakù mwa kufwisha bundù mwedi yònsò mpatà. Enzàku nanku's, Mukalenge. Ndi ndàmbula bantu bònso aba Kùdi, ndòmba bwa Wèwè kubàbènesha ne kubàpèesha lupàndu mu misùkà yabo, dyondopa dya mibidi yabo, ubifidila ku Yesu Kilisto Mukalenge wetù.

<sup>133</sup> Nenku ne mitù yetu miinyika, nèngiikalè mwa kwela lukonko. Kùdikù kaaba aka muntu udi kàyi mwena Kilisto, muswè bwa tùmuvùlùkè mpindyewu, wàmba

ne: “Nsambidilèku, Mwanèètù Branham” anyi? Nzambi àkubènèshèku kuntwaku. Mukwabo muntu ne: “Mémè ncyèna mwena Kilisto to. Nkààdikù muumvwè luumu lwà ne Yesu mmubiike ku bafwè alu, kàdi bwa kwamba kwimpè mémè ncyèna mucimanyèku to. Kacya Yèyè kí mmubiikekù ku lufù mu wànyì mwoyi ewu to. Ncyènakù ne disànkishiibwa nansha dya kànà to. Mémè pàànyì, ndi nsaama. Ntu mpicile mu mulongo wà babèèdi, ngaalukila nya mu mukwabo, ngaalukila nya mu mukwabo. Ntu muumùke ku ewu ekeleziya nye ku mukwabo, ne ku mwaba ne ku mukwabo.” Kí ng’aci to. Bwalu mbwà kuMwitabuuja. Yèyè mmubiike ku bafwè. Aci ncidi cikòse bwalu. Mukwabo muntu mmufwànyinekù kwela cyanza muulu anyi? Amba... Nzambi àkubènèshè. Nzambi àkubènèshè. Mukwabo muntu ne: “Ndi muswe kwitabuuja. Ndi muswe kwitabuuja” anyi?

<sup>134</sup> Mbanganyi bàdi bàsaamà mwab’ewu? Ela cyanza muulu, wambè ne: “Ndi muswe kwitabuuja. Ndi muswe kumanya Mukenji mu dinda emu.” Nzambi àkubènèshè. Abi mbimpè. Eyowa, Nzambi àkubènèshè, mwanàànyì wa balùme. Bimpè. Eyo.

<sup>135</sup> Mpindyewu, Teddy, ndi muswe wimbè “*Ngàngàbukà Munène*,” katanci kakese cyanàànà, bu wèwè mwa kuswà, “ùdi pabwipi apa mpindyewu.” Ne paucidi wenza nanku awu apu. . .

<sup>136</sup> Aci’s ncikolè mpindyewu mene. Bikèènà-kumòna nyawu bibwayika mu citanda cijimà, nwamònu’s. Eyowa, mémè ndi nteeta, mvwa nteeta bwa kucivwija dibishiibwa dya ku lufù, ditàmbe kutumbukakù ndambu, ditumbùkekù ndambu kutàmbe—kutàmbe mushikì wà butù wúnkaadi mémè musòmbepù awu. Ndi njingakù ndambu mukwabo wa dibuulula. Ndi mumanye cintu cimwèpelè: Pàncidi anu kacya ngaakwàta ku mudimu wà bwambi wà kumpàla awu apa, mwibidi kawàkulwa nansha, kawàkalwakù to. Mpindyewu pàncidi anu kacya ngaakwàta ku mwibidi apa, mwisàtù kawàkulwakù to, nwamònu’s. Bikèngela mpatukè buludi, mpatukè ne ngwitàbùùjè ne: “Nzambi ngudi mwambè!” Kùkaadi ndambu wa matùkù. . .

<sup>137</sup> Mpindyewu nudi mwa kubànduluka mpindyewu panwikalà baswè. Ndi ne byanza byenu; Nzambi ngudi naabi.

<sup>138</sup> Ndi muswè kunwàmbilakù kaacintu kampànda. Mwanèètù Ed Daulton, ngeela meeji ne yèyè wáfumu ku dibwela mu ciibi mwàmwa, mwanèètù wa maalu malenga wa ci-Baptiste, yèyè ne mukàjèndè. Mwanèètù Jeffries ùdi mwaba kampànda kaaba aka. Othel Jeffries. Ne yèyè ùdi kaaba aka, ndi mumanye ne ùdi mwaba kampànda kaaba aka. Pààbi, bânà beetu abu bàvwa balongòlòle disangisha kampànda bwa mémè kuyakù, mu Kentucky mwàmwa. Bânà beetu, bânà beetu bàà mushinga mukolè, banangè beena mutumba naabò ne bàà kwabo.

Kupetabò màbàlaasà ne nzùbù ya bilaminyi bya bingoma ne bikwabo, anu bwa disangisha dya dilòòlò òmwèpelè cyanààna, bafucile ne nzùbù ya bilaminyi bya bingoma. J. T. Hoover mwànà awu, cyònsò cyèndè. . . L. G. Hoover ùvwa mwenzè dikwabo mu Elizabethtown mwàmwa. Ne Mwanèètù Ed Daulton ku Willow Shade anyi—anyi ku Somerset, Somerset. Nenku mwanèètù, mwanèètù mukwabo yèyè ùvwa lwà ku Glasgow, mùmvwà mèmè mulediibwe amu. Bantu bàà mwòmù mùmvwà mulediibwe ne mukolèe amu abu, mwàkammwènekèlà wanjelo wa Mukalenge bwa musangu wa kumpàla amu.

139 Nenku mvwa muswe kwalukila. Kàdi mèmè kuumvwa kaadisàkiibwà kakese. Ki mèmè kwamba ne: “Ee, bwa bwalu bwa bânà beetu aba, nêndongololè disangisha adi.” Ndi mwenzè anu mfika mu cibandabanda eci, muminu wànyì wùmbà wùdikànga ne ncyàkaakula munda mwa matùkù citeema to, too ne mwàkajikà masangisha awu.

140 Mwanèètù Ruddell, yèyè, ùdi mwa kwikala pèndè kaaba aka mu dinda emu, umwe wa ku bânà beetu bàà mu tabernacle emu, yèyè ne Junie Jackson ne bakwabo, mvwa ne cya kwenza disangisha bwèndè yèyè. Kàdi dyàkàmwè, muminu wànyì wùmba wùdikànga. Kàdi katanci aka anyi, mèmè kupeta mubidi luuyà wa wipacila ku lukàmà ne yitaanu. Kàdi mvwa nganji kuya mu disangisha, dyàmbedi, ne—ne Doc Schoen kungambilayè. . . Mèmè kwamba ne: “Diyì ndimpàte.”

141 Kwambayè ne: “Nênkupèèshè cintu kampàndà bwa kusùlakajakù muminu awu, nenku ùtungunukè ne kuyiisha.” Ki mèmè kwangata cintu kampàndà cyàkampèèshàye, nenku, ciine ciwàci aci, ki kukòkaci ne kupàtakajaci mpoko wa mu dyùlu awu ne kumujikaci. Pashìishe mèmè kushààla mulààle mu bulààlù munda mwa matùkù citeema, mwikàle anu ne mubidi luuyà bu mbàbùlà.

142 Bààbùngì bàà ku bânà beetu kaaba aka kulwabò kùndì, bânà beetu bààbùngì bàdì bendè luumù kulwabò kunsambidila. Ki Mwanèètù Graham Snelling ulwàlwa ewu, ki Mwanèètù Ruddell ulwàlwa ewu, bânà beetu bônso aba, kudikungwijabò bônso, bàsambila ne bikwabo byônso. Mèmè nsambila, nteeta ne mwànyì mwônso, nciyikù nansha mwa kunungana kwetu eku to. Mèmè kudikonka ne: “Biine byônso ebi mbya mbwalu kaayi’s?” Mukàjàànyì mukese munanga awu musòmbe mwaba awu, yèyè ne bakwabo abu munkaci mwa kunsambidila, bitùngùnùke ne kushààla anu mwàbi ne kale. Kabàyi mwa kubyùmvwakù to.

143 Mpindyewu, kumpèèshayè bwanga bwa mèmè kunwà, kàdi ncyàkabùnwa to, bwalu bùvwa mbwà bùlàdikangana tulù. Ki dîbà adi mèmè kubilekela anu nanku’s. Kàdi mvwa anu mutùmngùnùke ne kudyàmbidila ne: “Mukalenge, bushuwa!”

144 Ki pashìishe, pààkajikà masangisha ònsò awu, mu òmwè kampànda (bivwa ne, disangisha dya ndekeelu, divwa ne cya

kwikala mu diisambombo), ki pashiishe (mùndi ngeela meeji), ki pashiishe, mu òm̀wè mèmè kuteetakù bwa kujuuuka. Mwva mutekètàngàne bikolè, mu mushindu wa ne ncìvwakù mwa kukòsolola cibambalu aci to. Mèmè kusòmba.

145 Nudi bamanyè's, ndi ne kusàkidila kwàbùngì bwa mukàjì mumpèèsha kùdì Nzambi. Kàdì nwènù, bàna beetu? Mukàjì wa bushuwa, mwena dyànyì mulelèlà!

146 Mèmè kusòmba. Mèmè kumubiikila ne cyanza, ne kumwambila bwa kwikalayè pabwìpì naanyì apu. Ki mèmè kwamba ne: "Meda, m̀ngà misangu ntu ndikonka's," mèmè ne, "ntu ndikonka ne, mbwalu kaayi ebu." Mèmè ne: "Bwa cinyi masangisha awu mafwànyine kwikalakù, kàdì Nzambi ùndekela mulààle panshì mushindu ewu?" Mèmè ne: "Mbyenzèke nanku bwa cinyi?" Ki mèmè ne: "M̀ngà misangu's ntu ndikonka Yèyè mwine ní ùtu mumbiikilè's."

147 Yèyè ne: "Kwèna udyùmvwakù bundù anyi?" Nwamònu anyi? Ki kungambilayè, ne: "Bill, kwènàku mumanyè ne Nzambi mmumanyè cìdìYe munkacì mwa kwenza neebe aci anyi? Shààla anu, anu mupùwe."

148 Ki pa nanku mèmè kubwela. Aci kuntàndishaci ndambu mu mushindu kampànda, nudi bamanyè's. Pa nanku mèmè kubwela ne kulààdila pa bulààlu. Kubwelayè bwa kushintulula bilàmbà bya pa bulààlù. Nenku ùvwa ne—ne byòbì bintu abi mu dibòko, nenku pàakapàtukàye, mèmè kutàngila, nenku kùvwa . . .

149 Mèmè kumòna cintu cya kal-. . . nzùbu munene menemene wa dilamina bingoma, uvwa d̀bà dituutè nsèsà ne dyupùle, dimuvingùtùle, d̀bà d̀vwà ditùme nsèsà yìfùmina mu Dyulu adi. Ki kulwakù bantu bakàjì basatu ne muntu mulùme umwe, kulwabò mwaba awu. Ne bàvwa bu ne tuntu tukese menemene tutàdika, bu tukese. . . tuubingoma twà mushindu kampànda, bu nanku's. Nenku muntu mulùme awu kwambayè ne: "Bidi bìpopela misonso." Ki yèyè ne: "Netwikalè. . . Wèwè ikàlà mukwàcile tuntu etu kuulu, Mwanèètù Branham, nenku netùkwibakùlwilè nzùbu wa dilamina bingoma ewu."

Ki mèmè ne: "Eyo, nèngènzè nanku."

150 Kàdì Cintu kampànda kwambaCì ne: "Kucyènjì to." Ee, mèmè kwolola cyanza panshì bwa kwangata kantu, mushindu ewu, bwa kumwibaka mushindu ewu. Kì anu d̀bà adi Diyì kwakulaDì naanyì, dyàm̀ba ne: "Mpindyewu bòbò bàdì mu njila bwa kukwaluja. Kùcìtàbùùjìku to." Dyòdì ne: "Bàdì ne meeji matòoke a menemene, ne bàdì bàlwa kùdì ne EMU MMÜDÌ MUKALENGE WÀMBA, kàdì bàdì mu ntùpàkànyì." Nwamònu anyi?

151 Fred Sothmann, bààbùngì bàà kùdìbo mwab'ewu, bàvwa anu mwaba awu mene pàm̀vwà mubàmbileci apu. Mu katanci kashàadile ku d̀bà òm̀wè, bantu kulwabo mu tùshinyi too ne

ku ciibi cyànyì. Mémè kwamba ne: “Kùdi bantu bakàjì basatu ne muntu mulùme umwe.”

“Aci ncyà bushuwa menemene.”

“Bàdi bàlwa ne EMU MMÙDÌ MUKALENGE WÀMBA anyì?”

“Eyowa’s, mukalenge, bàdi. . .”

<sup>152</sup> Mémè ne: “Mu bushuwa bwa bwalu, nwênù’s nudi bamanyè cya kubàmbila.” Ne meeji matòòke kàdi mu ntùpàkànyì, nwamònu’s. Bantu bàà maalu malenga, kàdi ne meeji matòòke mu ntùpàkànyì. Nwamònu anyì?

<sup>153</sup> Pashiishe mémè kudyàmbidila ne: “Ee, cìndi mwa kwenza ncinyì? Cìndi ne cya kwenza ncinyì?” Ki dībà adi Meda kubwelayè, ne yèyè ùvwa mwalùkile. Ki Mwanèètù Freddie kuyayè e kwambila bantu abu. Nenku pashiishe paanyimà pàà mutancì, nkààvwamù pa—pa bulààlù, ki mémè kudyàmbidila ne: “Bidi byènzeka mushindu awu bwa cinyì? Ncyèna mwa kwakula bwa cinyì? Ncyènakù mwa kwakula ne muntu kampànda, anyì cintu kampànda bwa cinyì?” Kàdi mvwa mudyàdije muntwamu. Ki Meda kubwelayè, ne ùvwa muswe kwalukila pambèlù pàà cibambalu apu.

<sup>154</sup> Ki mémè kutàngila, e kumòna cintu kampànda cyènta bu cidì citeema bu cidì cijima lwà ku luseke lùmwe. Ki mémè kutàngila, nyawu kùvwa eci. . .cimanu cyànyì kukàngukaci, nenku mémè kumòna Yesu. Mbanganyì bàà kunùdi bàkaadiku bangumvwè ngamba ne nkàadi mumòne Yesu misangu yibidi kacya bándela, mu cikèenà-kumòna? Ne mvwa ngeela meeji ne ngaadyàkuMumònakù cyàkàbìdi kumpàlà kwa cikondo cya nshìikidilu, nwamònu’s, kuMumòna cyàkàbìdi. Mpindyewu, mémè kutàngila, ne maulu àvwa anu mwaba awu mene, byenzè anu bu ne mvwa ntàngidila mu cimanu amu. Ne pàvwa Bible mutèèka mushindu *ewu*, Bible munene menemene mutèèka mu maulu. Ee, kùvwa cintu kampànda ciikàle ne bukènkè mu nyùngulukilu wa Bible amu, ne mu Bible amu kupàtukamù nkùrusè wa ngòlò mulenga wa dikèma. Ne nkùrusè awu ùvwa mwimàne mwab’awu mushindu *ewu*, ne makènkè àfùmina ku nyùngulukilu wèndè yònsò aku, ne Yèyè kupàtuka mu nkùrusè amu. Bible ùvwa ùleēja nkùrusè awu, nkùrusè awu ùMuleēja Yèyè. Nenku kupàtukaYè wènda wènda, ne kutùlukaYè buludì mwaba wùmvwà nsanganyibwa awu. Ndi mwa kucimòna anu bitòòke tòò, ndi mwa kumòna nkùrusè awu ùleēja nsuki Yèndè miikàle mwaba awu, miMupwekèle mwisù.

<sup>155</sup> KupwekeshaYè mèsù e kuntàngila mushindu *ewu*, e kungambilaYè ne: “Udi mwindile bàkushìndikilè mudimu wèbè wà bwambi mupyamùpyà.” Yèyè ne: “Mémè’s nkàadi mumanè kukushìndikilawù. Wùkaadi mumana kushìndika. Bùdi wèwè naabù mbwà kuwitaba.” Nwamònu anyì? Ki mémè kwimana mMutèèleja anu katancì kakese cyanààna. Ki kumvwilaci mu

meeji. Ncìvwa muumvwè cyôci aci to, cìvwa cimvwilè anu mu meeji cyanààna.

156 Bu mùdi muntu udi ngènzàmpèkààtù kacya anu bààmulela, kàdi mumanyè ne Bible ùtukù, mumanyè ne Nzambi ùtukù, kàdi dyàkàmwè ùtèeleja diyiisha kampànda, pashiishe Cintu kampànda cìmwambila ne, “Ngwèwè.” Pashiishe, Dìyì anu dyôdi dimwedimwe adi ditukù dībà dyònsò, kàdi Dyôdi dilwè kushìndikiibwa kùdiye, dībà adi yèyè wàmba ne: “Mukalenge, mfwilèku luse.” Kàdi kacya kwikala ne dikwàcisha nansha dikese to anu pàdiye wìtaba lupàndù lwèndè, pashiishe ùpàtuka ne ùlwa mwena Kìlìsto. Nansha mwelè mbilà munyì, nansha musèngèlèlè munyì, bidì bikèngela àCìtàbè.

157 Nenku Yèyè kungambila dībà adi ne: “Bikèngela ùcìtàbè mushindu wumwewumwe awu. Bikèngela ùcìtàbùùjè.”

158 Mémè ntu ne bwôwà bwa dicìmunyìibwa. Cintu kanà cyònsò, ntu ncìina ne nkwèpì kùngààlwà kutwàla cilèndwishi. Ntu mémè misangu yònsò anu naaci bwôwà, ntàngila, ndyàm̀bidila ne nkwèpì kùngààlwà kubiikila cintu cibì. Bwalu, ndi mwangàte didìmwija dya Bible, mùvwà Mòsà mupèèshìibwe bukolè bunene, ne kutuutayè lubwebwe pamutù pàà kwakula naalù. Ndi mvùluka Eliyà, bwalu wàkapeta dībàla, bānà bakese abu bāmuyòbola bāmba mùvwàye ne mutù-dībàla: ki kwelayè bānà abu mulawu, ne makumi anaayi ne babidi bāà kùdìbo kushebeyiibwabò kùdi ours, nwamònu’s. Nenku aci kacìvwa Nyuma Mwimpè to, kàdi awu ùvwa mmupròfetà, mufiikishìibwe munda. Kadi mémè—mémè ndi mupicìle mu maalu ònsò, mufikè too ne ku ciine aci.

159 Nenku ki Yèyè uvwa mwimàne mwaba awu awu, wàkula naanyi. Ki kwambaYè ne: “Kadi wèwè udi wenda ne bantu bapitèpìte búngi.” Yèyè ne: “Bwa kwenda Naanyi, wèndè nkààyebeè.”

160 Mvwa mumòne dībà adi ne, mvwa mutàmbe kutwà màngumba ne bikwabo byònsò nyama ku mikòlò, nudi numòna’s, muntu ùteeta kukwambila cya wèwè kwenza ne cya kubènga kwenza. Bikèngela ùMulondè Yèyè. Mpindyewu, vùlukàayi cìkèènà-kumòna cìtùYe mumpèèshe pa mishipa, nudi bamanyè’s, ne mùdi kùyi mufwànyìne kulongesha bānà bāà mu mabòkò bāà beena Mpenta bimanyinu bitàmbe-mfùkilu. Nudi bavùlùke to. Nenku ki cyôci cìvwà mwaba awu aci. Ne mémè ndi anu ku mwelelu menemene wà Mukenji mupyamùpyà ewu.

161 Cìkèènà-kumòna aci ncyenzè anu cinguumuka, mémè kwamba ne: “Amen, Mukalenge!” Ne mukàjàanyi ùvwa mwimàne mwaba awu, kwambayè kuuminyina. Ki mémè kutùpika e kuumuka mu bulààlù amu, mwikàle mwa kwakula bimpè anu mwànyì ne kale. Anu mu katancì kakese cyanààna, mubidi-luuyà wònsò muyè mwamwamwa.



162 Mémè kubiikila Doc Schoen ku tèlefonè, kwamba ne: “Ndi muswe bwa ùnkenkètè.”

Kwambayè ne: “Cinyi?”

163 Ki mémè kulwa mwaba awu, yèyè kunkenketa, kukenketayè mpoko ya mu dyùlu yònsò ayi, kwambayè ne: “Ngambilèbi túng cidi cyezèke, Mwanèètù Branham.”

Ki mémè kwamba ne: “Udi mufwànyine kwitabuuja bwalu bûngààkulondelà anyi?”

Yèyè ne: “Ndi mufwànyine kubwèla mpatà munyi? S’mbyenzèke.”

164 Ki cyôci, nwamònu’s. Ki cyôci, mulundà wanyi. Nzambi mmumanyè mwa kukulaminyina pa mushiki wà butù. Yèyè mmumanyè mwa kukwenzela cintu kampànda too ne pààfikishàYe Mukenji kùdì, wamònu’s, bwa kufika ku dyenza cintu kampànda.

165 Leelu ewu, ncyèna mumanye ne ndicimunyiibwa bûngi kaayi to. Ndi mubwelè kî nkwanji kwenza ntántà mule to, mvwa ntèeleja nguumu ya ku tudyombà. Nenku kùvwa mwambi kampànda ùyiisha pa dibìkà dya ku lufù, mucyàngàcile mu Kolintò wa Kumpàla 15. Nenku yèyè ùvwa ùyiisha pa dibìkà dya ku lufù. Ki kwimanyikilayè anu munkaci mwa diyiisha dyèndè, kwambayè ne: “Nudi bamanye’s, bantu bààbûngi menemene batu ne bwôwà bwa dicimunyiibwa.” Yèyè ne: “Kalààlà kàà màsàlaayi Patton pààkajimijaye musumbà mujimà wà bàsàlaayi,” yèyè ne, “dîbà adi kumwambilabò. . . Kutùmayè mukenji paanyimà ne ùvwa dijinga ne bakwabo, ne bòbò, e kumutùminabò bakwabo. Kubàshebeeshayè, ne kulòmbeshayè bakwabo. Kàdi pààkapetaye musumbà mwisàtù awu kuntwaku,” yèyè ne, “musangu wònsò wùvwa anu dizaji didila, bàvwa bànyeemena mwinshì mwa cishèètèshèètè cya cyamu, anyi bànyeemena mwinshì mwa cintu kampànda cikwabo, bumvwe bwôwà.”

166 Kwambayè: “Ntùmìnaayi bantu bakolè, kî mbânà to.” Yèyè ne: “Ndi nkèba bantu bàdì badilongòlòle bwa kufwà. Ncyèna muswe muntu udi ucìna kufwà to. Pìikalà bwalu butùdì tulwila mvità kabùyi bukùmbànyine kubùfwila to, apu kaayi bàlamàayi kule naanyi. Ndi nkèba bantu bakolè.”

Kwambabò ne: “Kàdi’s nyawù wápangìdì mu mvità misangu yibidi anyi yisatu mijimà.”

167 Kwambayè ne: “Ncyèna mupangìle mu mvità minene to. Ndi mupangìle anu mu tavità tukese cyanàànà.” Cintu kampànda kwakulaci mu mwoyi wanyi.

168 Ndi mvùluka mwakambà Eisenhower ne: “Pâmvwà ntùma dizaji, ntùma dìyi ne bòbò bèèla mutèlèngè mu cingoma, bàvwa bàwùkòka kàdi wùfùnkà, kawùyi ne cidìwu wènzà to,” yèyè ne, “mémè ncivwa ndekela mvità bwa kudifila to. Mvwa mpátula

mutèlèngè awu ngeelamù mukwabo, ngùteeta. Wòwù kawùyi mudilè to, mvwa ngeelamù mukwabo, too ne pâmvwà mpeta wà wùdila.”

<sup>169</sup> Ki mushindu wùdibi bikèngela bwa kwenjiibwabi. Ncyéna mumanyè mwikalàbi to. Kàdi Nzambi bu Mulumbulwishi wanyi pa cyambilu eci, ncyéna mumanyè búngi bwa difúnka ne búngi bwa—búngi bwa tuvità tukese túngàápangilámu to, kàdi ncyákupangila mu mvità minene nansha. Yéyè mmungambile ne Neikalè naanyi. Nèngiimanakanè too ne pàngààmònà mudimu wa bwambi awu ùshìndikiibwa ne ngùmòna munkaci mwa kwenzeka. Ndi mbanga mu dinda emu, ku ngàsà wa Nzambi. Ncyéna mumanyè ní wènzékela mwab’ewu, ní wènzékela mwaba mukwabo kampànda, mwènzékàwu mwine anyi cìikalà mwa kwenzeka aci. Kàdi nèndondè anu milongo ya babèèdi, nsambidila babèèdi, too ne pàngààmanyà bushuwa cidi munkaci mwa kwenzeka. Nkààdikù muwùmòne mwenzèke misangu yibidi anyi yisatu.

<sup>170</sup> Nkààdi muwùmòne mwenzèke mu nzùbù mwa Hattie. Mbanganyi bàkaadiku bumvwè bwalu-bulonda bwa nshìndi, ne bwa mwànà wa bakàji, mukàji mukese awu? Muntu wa nzànzànzà mu bònsò kacya twàmanya, kacya ku matùkù a bayiidi, ukààdikù mupèèshìlbwe dyèsè dya kwamba ne: “Lòmba cyùdi muswe,” paùdi mwaba awu apu. Nukààdikù bumvwè bwalu-bulonda abu anyi? Kacya nukààdi bamòne mukàji awu anyi? Mbanganyi bàtù kabàyikù banji kumumòna, kàdi baswè, baswè kumòna mukàji uvwaci cyenzèkéle awu? Tudi . . .

Hattie, udikù mwa kujuukila kuulu anyi? Inàbànzà awu’s ki yéyè wàwa?

<sup>171</sup> Mvwa mwimàne mu nzùbù mwèndè. Paanyimà pàà mèmè mumanè kumòna nshìndi mwandamukùlù, kakùyi mpatà to kakùvwa nansha umwe ùsanganyibwa mu nyùngulukilu amu to, kadi, ngamba anu dīyī cyanààna, ki yōyī ayi miimàne mwaba awu. S’mbulelèlè. Aci cidi, ki yōyī mwaba awu. Ki mèmè ne: “Cyàkenzà ne nshìndi ayi yilwe mwaba awu ncinyi?” musòmbe ku mèèsà kwèndè aku. Nénku mamwèndè, Mwanèètù wa bakàji Wright, ki Mwanèètù wa balume Wright nyéyè ewu, ùvwa musòmbe mwaba awu. Mbanganyi bàvwà ku mèèsà aku, mbanganyi bàdi kaaba aka mu dinda emu? Elààyi byanza muulu. Ee, s’ki bôbò abu, mu citanda mwònsò. Nwamònu anyi? Eyo, bàvwa mwaba awu. Ki mèmè kwamba ne: “Dìngà ditùkù . . .” Mwakùnyààbù wa bakàji cikalàbà awu ùvwa musòmbe mwaba awu.

<sup>172</sup> Mèmè kwamba ne: “Bikèngela bìlwe ku cikèènà-kumòna, ne bikwabo, kadi dīngà ditùkù ne bìlwe mushindu mushìlàngàne.” Mvwa ngaakula mushindu awu. Dyàkàmwè, Cintu kampànda kulaaba Cì cyòci aci maanyi (kucishiya kùdi bantu aba), kacyakacya ncivwakù mwanji kuumvwa dilaabiibwa dya

mushindu wàwà to. Bwa cinyi? Bwalu Hattie wàkamba cintu cijaalàme.

173 Mémè kwamba ne: “Nshìndi ayi yìvwa mifùme penyì? Kakùvwakù nansha umwèpelè mwaba awu to, nansha mene mwaba wùvwàyi mwa kwikala, anu bu mùdì pa dikunji dya tèlèfonè mwaba awu mene. Nenku nkààdi mucìmòne cyenzèke misangu mwandamukùlù milondàngàne.” Ki mémè ne: “Ncyèna mumanyè kùvwàyi mifùme to.” Mémè ne: “Cintu cimwèpelè cìndì mumanyè ncyà ne, Nzambi wàkateeta kushìndikila Abraham Mukenji musangu kampànda, ne wàkaakula cimpàngà cya mukooko cyàkiikalakù, bwalu Yèyè ùvwa dijinga ne cimpàngà cya mukooko, bwa kuWùshindika. Bidì ne cya kwikala ne mémè mvwa dijinga ne nshìndi, bwa kulwayè yànyì ayi kwikalayìku. Ki kucyènzaYè misangu milondàngàne mwandamukùlù, anyì, misangu mwandamutekète’s wè, misangu mwandamutekète’s milondàngàne.” Ki mémè kwamba . . .

174 Nenku, Hattie, pàmwápa kàyi mumanyè civwàye wàmba to. Tàngilàayi mwàkacìngulukàCi babanji ne badibàndishi. Tàngilàayi mwàkacìngulukàCi byònsò abi, kàdi kulwa kùdì mukàji mukùlàkàji mupèlè wa ku musòkò kwàka.

175 Ne mémè mvwa ne ndola makumi abi mu mpaayà, ya kwalujila mukàji awu, bwalu, yèyè ùvwa mwenzè mulayi wà kufila ndola makumi ataanu bwa ekeleeziya mupyamùpyà wìkala mwa kwibakiibwa ewu. Kadi ncyèna ngamba nùnku bwa kumufwisha bundù to; kàvwa ne mushindu wà kupeta meeyà makumi ataanu etu aa to, bwa kwamba kwìmpè, bwa kuàfilayè. Kàdi, bu mùvwà mwoyi wèndè mu Mukenji, yèyè ùvwa muswe kuyifila. Mwanèètù Neville, ngeela meeji, ùvwa muyítàbe, kàyikù mufwànyine kwangata yìvwa yìshààla ayi to, kadi kumulekela ùfila anu ndola makumi abidi. Nenku mvwa ne tubèji tubidi twa ndola dikumi dikumi atu mu mpaayà, tùvwà Meda mumpèeshe bwa byàkudyà, nenku mémè kwamba ne: “Nèmmwalùjilèyi leelu ewu.”

176 Pashìishe mémè kudyàmbidila, Cintu kampànda kwakulaCi naanyì, cyàmba ne: “Yesu’s wàkamòna mukàji wa mu lufwilà awu wèla tuumeeyà twèndè tusatu atu, kàdi kacya Yèyè kààkamwalujilatù to.” Yèyè wàkamulekela ùtùfila bwalu Ùvwa ne cintu kampànda cya citàmbe bunene kundekeelu kwa njila.

177 Ncìvwakù mumanyè ne Yèyè ùvwa wàkula naanyì mushindu wùmwewùmwè awu, bwa mukàji wa mu lufwilà, kàyi ne mulùme to. Bàyèndè ùvwa mushipìibwe. Anyì ncìvwa mumanyè ne n’Yèyè umwèumwè awu to, pàngààkambà ne: “Nenku nèndamè anu ndola makumi abidi eyi, Wèwè udi ne cintu kampànda cikwabo bwèndè yèyè.”

178 Mémè kwamba ne: “Cintu cimwèpelè cìndì mumanyè, ncyà ne Yehowah ùcìdi anu Yehowah-Yilè. Ùdi ne bukolè bwa kulongolola mulàmbù.”

179 Nenku Hattie, kàyi mumanyè cìvwàye wàmba to, kukàtamukayè panshi e kwamba ne: “Aci cidi anu bulelèla pa bwòbù, Mwanèètù Branham.” Kaa, ekelekele! Aci’s cìvwà cintu cijaalàme cya kwamba. Aci’s cìvwà cintu cijaalàme cya kwamba.

180 F Lwà pa dyòdi dìbà adi, Bukolè bwa Nzambi kutuutabù mwaba awu; kacya ncìvwakù mwanji kuumvwa dilaabiibwa dya mushindu wàwa to. PààkatuutàBu nanku, mèmè kwamba ne: “Hattie, EMU MMÙDÌ MUKALENGE WÀMBA, lòmba cyùdi muswè! Nansha ciikàle cinyi, Nzambi wàmpeèshi bukòkeshi bwa kukupèèsha dijinga dya mwoyi wèbè anu patùdi twakulangana apa. Wèwè mulòmbe mùliyò wà ndola, udi mwa kuwùpeta. Wèwè mulòmbe bwa mwànà mutekète wa bakàji cikalàbà wàwa bwa kujuukayè ne kwenda, yèyè nèacipetè. Lòmba cintu cikwabo kanà cyònsò.”

Kwambayè ne: “Cìngàalòmba ncinyi’s, Mwanèètù Branham?”

181 Mèmè ne: “Cyònsò cyùdi ujinga aci. EMU MMÙDÌ MUKALENGE WÀMBA.” Kaa, njiyà kaayi’s wè!

182 Kukènzakanayè eku ne eku. Tatwèndè mukùlakàji wa mvyà ku mutù ùvwa musòmbe mwaba awu uvwa mwenzè bu mubiishibwe ku bafwè awu, ùkaavwa mwambè kufwà. Mamwèndè mukùlakàji ùvwa musòmbe mwaba awu, ne mubidi lùyòwayòwa. Mwakùnyèndè wa bakàji ùvwa musòmbe mwaba awu, cikalàbà.

183 Kadi kusungulayè anu cìvwà cijaalàme. Ùvwa ne bânà bàà balùme bansongà babidi bacikàle anu mu cipimu cya kabàyi bàcyùka myandà to. Bàyèndè wa mushinga mukolè muyè mu Butùmbi; yèyè ùvwa mwena Kilisto, mwindile. Kadi bânà bàà balùme abu kabàvwa beena Kilisto to. Kwambayè ne: “Misùukà ya bânà bàànyi bàà balùme babidi.” Nzambi àbeneshè mwoyi wèndè.

184 Mèmè kwamba ne: “EMU MMÙDÌ MUKALENGE WÀMBA, wayipeci.”

185 S’mbòbò aba, babàtìjìibwe mu Diitabuuja. Bàvwa bàndondela dilòlò adi, mene ne, mwànà mukese menemene wa balùme uvwa wòweshangana màyi ku makàsà muntu mwàmwa, mutentèke byanza pa mutù wà Mwanèètù Neville awu, ne ùmusambidila pàvwàye ùmwowesha màyi ku makàsà apu.

186 Bânà bakese babidi bàà balùme abu pàmwàpa mbasòmbe kaaba aka mu disangisha emu mwaba kampànda mu dinda emu. Bàdipù anyi, Hattie, bàdi neebe kaaba aka anyi? [Mwanèètù wa bakàji Hattie ùdi wàmba ne: “Bàdi paanyimà pààpa—Muf.] Paanyimà, paanyimà. Nudi penyì, nwènu bânà bàà balùme? Elàayi byanza muulu. Bânà bàà balùme babidi abu bàdi penyì? Mbòbò bàba, biimàne kuulu lwà paanyimà pààpa. Nzambi ànùbènèshè. Eyo. Ki bwalu mbwòbù abu’s.

187 Mpindyewu, cìvwà cyenzèke ncinyi? Cintu cimwecimwe aci, nansha ciikàle cinyi, nùнку ncimwenzèkèle. . .cìvwàye mufwànyine kwikala mulòmbè aci, nùнку mmucìpetè. Nùнку mmucìpetè.

188 Mpindyewu ndi muswe kumòna aci cyènzeka. Neciikale lwidi lùdi naalù bantu ku Mukenji. Nùdi numòna mùvwàye mucyàmbè anyi? Ùvwa mwambè anu cintu cijaalàme menemene. Cyùdi wamba aci, ki cidi cyènta bwalu. Cyùdi wèwè wamba aci!

189 Tàngilàayi mukàji mwena Syrophénicie awu pààkalwàye kùdi Yesu. Wàkamba ne: “Mukalenge, mwanàanyi wa bakàji mmutàcishiibwe bibi be kùdi démon. Wèwè Mwàna wa Davidi, lwà ùmwondòpèku.”

190 Yèyè kwamba ne: “Kì mbikùmbàne bwa Mémè kwangata dyàmpà dya bàna bwa kunùpèèshadi nwènu tubwà nansha.”

191 Yoyòyò! Ambàayi tǔng bu ne Ùvwa mwambè ciine aci kùdi umwe wa kutùdi eku? Nùнку twètù's tudi bambè ne: “Umbiikila mémè kabwà? Huh, kwòkù kwine, kakwèna bwa nsongo kùdiYe to! Ekeleeziya munene awu's mmubingè. Yèyè kàdi ki munsantu mubùnguluki wa mu malaba's. Yèyè kàdi ki Beelèzèbùlà wetu wa menemene ewu.” Twètù's nùнку tudi bapetè lwidi alu. Kàdi kí mmukàji awu to.

192 Yèyè wàkamba ne: “Ncya bushuwa, Mukalenge. Udi mubingè cya bushuwa. Kàdi tubwà's tùtu tuswè kudya nkòtòòto ya mwìnshì mwa mèèsà a bàna ayi.”

193 Aci kàdi kuMufikaci's. KwambaYè ne: “Kàdi bwa edi dīyì, démon awu ùmùkù pa mwanèèbè wa bakàji awu. Bwa edi dīyì!”

194 Lwidi lwenu ndùdi ne bwalu, balundà bàanyi. Kì ncyàkambàYe anyi? Bikèngela nucitàbùùjè, nwènu balundà bàanyi. Nwènu, kanùngiitàbùùjì mémè to, mémè ndi muntu; kàdi itàbùùjaayi cìndi nzwàmbila, itàbùùjaayi Mukenji. Nwènu kanùyì nwitabuuja mùsànjeelà to, itàbùùjaayi Mukenji. Bu ne muntu ùvwa mubwelè mu cibambalu emu, mwikàle ne mukenji wà ku nshinga, nansha mwikàle nganyì, mmwènekelu uvwa muntu awu mwa kwikala nendè anyi ní ùvwa nganyì, munene anyi mukese, nwitabuujè cidi pa mukenji wà ku nshinga aci, kí mmuntu awu to. Nzambi ngudi muntùme bwa kunwàmbila. Mémè ndi ne Mukenji. Nzambi ngudi muntùme bwa kunwàmbila ne Yèyè mmubiike ku bafwè, ne Yèyè ùdi kaaba aka mu dinda emu. Wàcijaadikidi ku bimanyinu ne maalu a kukèma ne, Yèyè ùdi kaaba aka, ne yònsò wa kunùdi ùdi mwa kwondopiibwa ku bubèèdi bwèndè bu wèwè anu mwa kwangata lwidi lujaalàme paùdi ulwa apu. Swàku wènzè nanku, patùdi twimba *Itàbùùjà Nàka* apa.

195 Mpindyewu aba biikalàbo ne cya kusambidila abu, bàlwe buludì kùneeku ne belè mulongo lwà apa nùнку. Mpindyewu, kùlu paùdi kùyì mwitabùùje ne mwoyi wèbè wònsò to.

<sup>196</sup> Mukalenge wa mushinga mukolè, ki dîbà ndyôdi edi. Ndi ndômba bwa Wôndopèku bantu aba, Mukalenge. Kabîdi jidilàku maanyî aa. Dyângàcilèku Wêwè mwine butumbi, Taatù. Tudi tutùma byôbi ebi mu Dîna dya Yesu Kilisto. Amen.

<sup>197</sup> Ndi ndikonka ní tudikù mwa kulômba bantu bàdi biimàne ku *elu* luseke aba, ní kùdikù mushindu wà kupetabò anu kaaba kakese apa nùnkù, bwa twamônakù mwa kupicishilapù bantu, kwôkù mushindu. Anu lwà apa mene, bàpàtukila *kwàka* nàka. Dîbà adi bàdi mwa kuvwila bônsò lwà kùneeku, bàpweka anu ne mulongo, bwa kwenza mulongo wùmwepèlè wà wùpàtukila kwàka nàka.

<sup>198</sup> Bikèngela cintu kampànda cyènzekè's, Mwanèètù Neville. [Mwanèètù Neville ùdi wàmba ne: "Amen. Cìdi munkaci mwa kwenzeka patùdi twakulangana apa. Mukalenge àtumbè! Yesu ùdi kaaba aka. Eyowa. Yônsò wa kùdìbo wôndòpìbù ku Bukolè bwa Nzambi."—Muf.] Amen.

<sup>199</sup> (Wamba ne? Eyo. . . Ee, to, anu luseke lukwabo alu. Mèmè ne Mwanèètù Neville, eyowa, netùbàsambidilè ku ndekeelu aku mene. Pa nanku, kanwèna mwa kulwila naabò eku to, bwalu nwènù benzè nanku, nudi bafwànyîne, nenwikalè mwa. . . Indilà kakese. . . ? . . .)

<sup>200</sup> Mpindyewu ngänji kwambila batèèleji bàdi bindile abu ne: *Eci* n'Diyi dya Nzambi, Yèyè ùndi. . . Cìndi mwikàdilekù ne mwoyi, ne cingààfwilà ku cyôci, ku ngàsà ne dikwàcisha dya Nzambi. Nzambi mwikàle Mulumbulwishi wanyî bya kakuyi tuseku to, ngänwàmbidi Bulelèlà. Ndi mumòne, ne bintu byônsò ebi bicìtwa nyama ku mikòlò. Nansha mene kuumukila ku kaamushipa kakese kààkabishiibwà ku lufù kuntu kwàka aku, nukààdikù bumvwè bwalu abu anyi? Ki bantu mbaabù basòmbe paanyimà pààpa, bônsò babidi, bàvwàpu pàvwàci cyenzèke; mvwa mucyàmbè ditùkù dijimà kumpàlà kwa kwenzekaci. Mpindyewu, mmunyi mùndi mwa kunwàmbila bintu bìdiku ebi? Nwamònu's, ndi muswe kuyiisha, òmwè dya ku malòlò aa, pa *Cidi Mwà Kukàndameena*. Muntu mmufwànyuine kunwàmbila cintu kampànda, kàdi kutùngunuka ne kwibaka anu mushindu awu, kàdi kwôkù kakuyikù Mufùndù bwa kucikàndameena to, kumanakumana necyùpukè. Dijingulula edi, ne bikèènà-kumòna ne bikwabo bingànùlondèdi abi, byôbi kabiyi Bulelèlà to; cya kumpàla, kùdi Bible bwa kucìtwa nyama ku mikòlò, ne kùvwa Nyuma Mwimpè bwa kujaadika ne ndi munwàmbile Bulelèlà.

<sup>201</sup> Mpindyewu, ndi mu budimi bwa bwambi kùkaadi bidimu dikumi ne binaayi, mpicila mu didyudiibwa dyônsò òvwa difwànyîne kupeciibwa kumpàlà kwànyî adi. Bàdi balongè tulaasà, beena meeji matwè, ne bikwabo byônsò, musangu nansha wumwe kabàvwakù mwa. . .

202 Pashiishe nudi bamanýè cyàkambabò anyì? Nukàadi babyùm-vùmvwe kaaba aka. Bàtu bàmba ne; “Bantu mu batèèleji amu bàtu bàya eku ne eku, bàyiikila ne bantu.” Kumpàla bàvwa bàmba ne bàvwa mbantu bàà mu ekeleeziya wanyì, bàdi bàya kuntwaku bwa kwenjiibwaci. Kadi kabàvwa mwa kubinga ne aci to, bantu bàdikù bapite búngi.

203 Cintu cìvwà cilondà cyàkambàbo, ncyà ne: “Mbifwànyine kwikala bu bàna beetu” bàdi bènda naanyì abu, “bàdi bìimana paanyimà pààpa bàmba ne: ‘Ewu muntu ùdi ne bwalu bwa luumvu, mu macì èndè amu.’”

204 Pashiishe kwambabò ne: “Billy Paul, Billy Paul ùvwa ùlwa ne—ne ùbànda kuntwaku ùbala bìdi pa karta, bidi bantu bàmba abi. Kwòkù cintu cidi kaciyi cyènda bìmpè mu macì àbò amu, ùvwa wàmba ne, ‘macì àbò’ anyì ‘cìfù cyabo.’”

205 Nansha twamba mwine mmunyi mùdì bàdi kuntwaku bàdi kabàyi ne karta kàà disambila abu bafwànyine kwenza aci? Nansha twamba mwine mmunyi mùdìci mwa kudyànjila kwamba maalu àdì ènzekà anu mu ówò menemene awu? Mbifwànyine kwikala mushindu awu munyi? Kì mbifwànyine kwikala aci to. Muntu kanà yònsò ewu mmumanyè nanku, udi ne meeji èndè mu ówò awu.

206 Bààkamba cintu cimwecimwe aci bwa Yesu, pààkayà Filìpò kangata Natànaèlà. “Yèyè ùvwa mulundà wa Yesu.” Kwambayè ne: “Ncyà bushuwa ne, yèyè ùkaavwa mwambile Yesu byònsò abi. Yèyè ùdi ùkamwàngata.”

207 Kì pashiishe bayiidi abu kwambabò, anyì bayiidi bàà ekeleeziya munene abu kwambabò ne: “Muntu ewu m’Beelèzèbùlà. M’Beelèzèbùlà. Mmwena lubùku.”

208 Yesu kwambaYè ne: “Nènnùfwilè luse bwa aci. Kadi dǐngà ditùkù Nyuma Mwímpè nealwe bwa kwenza cintu anu cyòci cimwecimwe eci, dǐyi dibì òmwè bwa Cyòci aci kadyàkufwidiibwakù luse nansha.” Mpindyewu bu. . .

209 Mèmè ntu neenu ne meeji matòòke, ne meeji matòòke anu ne mwànyì mwònsò. Kaa, ndi mufwànyine kwikala mwambè maalu àbèngàngana ne àmwè miitabuuja anùdi naawù mu tèlòjì wenu mukese awu ne bikwabo. Kadi, cǐndi ngenzela nanku awu, Pòlò mmwambè ne: “Bu mwanjelo wa mu Dyulu mwa kulwa kuyiisha cintu cikwabo nansha cya bishi cishiilàngàne ne cidi Bible wàmba,” ne cìvwàye yèyè mulongèshe, “èdiibwè mulawu.”

210 Pa nanku, bìdi bikèngela ndondè anu cidi Bible mwambè. Pìikalàbi ne Bible mmwambè ne: “Yèyè ùdi umwèumwè awu makèèlèlà too ne kashidi,” mèmè’s ndi ngiitabuuja nanku. Anu cyònsò cidi Bible mwambè aci, anu aci menemene ki cǐndi mèmè ngiitabuuja. Ndi mèmè ncyàmba anu mushindu awu. Mèmè ncìtu mupetè dilonga dya kàlaasà to, ncìtu mupetè dilongeshiibwa kanà dyònsò edi to. Ntu mutèèlèje anu Nyuma Mwímpè ne Bible. Nenku too ne ku leelu, too ne mu dinda dya

Paasàkà edi emu, bidimu makumi asatu ne cìmwè mbyôbi ebi, Yèyè kàtu mwanji kumfwishakù bundù to.

211 Nenku ndi nnwàmbila ne Nyuma Mwîmpè ngudi mungambile bwa mudimu wà bwambi wùlwalwà awu, mu bidimu bibidi anyi bisatu bishààle ebi, ne ndi ngenda ngambila maèkèleeziyà myaba yònsò. Ne Nzambi wa Bukolè bwònsò mwikàle Mulumbulwishi wanyì, anu kaaba aka ku luseke lukwabo lwà Salèmà eku, nshindi ayi mmifikè ku diikalakù mwaba wùdì kawùyikù nshindi to. Anu kuntwaku pàmwè ne Charlie, biimàne kuntwaku, ne bààbùngì bàà kùdìbo mûneemu mu Kentucky emu; nshindi ayi kulwayì mu myaba yìvwàyi kayìyi yisanganyibwa to, mèmè kwamba mwaba wùvwàyi mwa kwikala. Kwine aku nkùvwà Tony ne bakwabo, Banks, basòmbe mwaba awu. Kàdi ki cyôci aci mwaba awu, menemene. Kwalukila buludì, ne muntu wa nzànzànzà uvwaci cyambiibwe bwèndè, ùvwa mmukàji awu musòmbe mwaba awu, nenku's ki cyôci aci. Dinda adi kuntwaku, pàmvwà nsaama muminu awu apu, mèmè kumòna Yesu mwimàne kumpàlà kwànyì, ki kungambilaYè ne mudimu wà bwambi awu wùkaadi mumana kunshindikila.

212 Mpindyewu ciikalà mwa kwenzeka ncinyì, ncyèna mumanyè to. Kàdi, cintu cìmwèpelè ncyà ne, bikèngèla nteekè mukwabo awu ku luseke, bwa kwela cidya kufika ku wòwò ewu. Ki mushindu wùmwèpelè wùndiku mumanyè mwa kwenza. Cìmanyiibwè mpindyewu, eci cìfunduubwè, mwàmbì Yobò mu dinda emu amu, ne kasàlà kàà cyamù, pa dibwe. Ncyèna mumanyè cya dyanza to. Cintu cìmwèpelè cìndì mumanyè, nkwela cidya kuya kumpàlà. Yèyè ngudi mungambile. Ne Nzambi ngudi Mulumbulwishi wanyì, Yèyè ngudi mungambile. Mèmè nganwàmbidi Bulelèlè. Nenku piikalàbi ne Nzambi ngudi mushindike ne munwàmbile, ne kakùyikù musangu nansha wumwe wùdiku ní nganyì ní nganyì kaaba aka mwa kutwàku cyanza pa ní ncinyì cikaadiku cya mafi, nenku eci pààci ncilelèlè. Ncilelèlè pààci.

213 Mpindyewu pàndì nya apa nkiimana ku ndekeelu kwa mulongo. Ndi ngangata mukùlù, Mwanèètù Neville wàwa, muntu wa difwànà dya Nzambi, mpaasàtà wetù kaaba aka, bwa kulaabayè bantu maanyì. Nèngùikalè mwa kutentekela bantu byanza, bwalu mudimu mutùmangana naawu wà Yesu, paanyimà pàà Paasàkà, wùvwa ne: “Ndàayi nukatentèkèlè babèedi byanza, bóbò nebàsangalè.”

214 Ncyèna mumanyè ciikalàYe mwa kungambila mu mulongo amu to. Nènteetè bwa kuumvwakù dilaabibwa dya ditàmbidile adi. Ncyèna mumanyè cyènzekà to. Ncyèna mumanyè to. Cyònsò ciikalàku aci, mèmè nèngènzè anu mùdìYe Yèyè ùngambila amu.

215 Mpindyewu wèwè lwà, lwà ne mwoyi mùle tètè. Nansha Yèyè mukutàndishe, anyi Yèyè kàyi mukwambile cintu nansha



cimwè, kùyi wèwè utàngila cidiku to, umùkà ùye wenda uMusàkidila, udi umòna's. Bwalu, mudimu mmumana kwenza, mu mushindu kampànda bùdiwu naabù mbwà kufika kùdi.

<sup>216</sup> Mpindyewu, mwanèètù wa balùme, ne mukòlò awu, ndi muswè bwa wèwè kuciitabuuja. Pìikalàbi ne Yèyè, ku tèlefonè, ùvwa mwa kuumusha disaamà dya cifù adi, s'ncya bushuwa ne Yèyè mmufwànyine kuumusha disaamà dya mukòlò adi mu dinda emu, wamònu's. Mpindyewu itàbùùjàku ne mwoyi wèbè wònsò.

<sup>217</sup> Ne inàbànza udi ne mwànà mukese wa mu dibòkò uvwa ne disaamà dya mwoyi awu, kwèdikù kabidi mpatà to. Itàbùùja! Itàbùùja!

<sup>218</sup> Mpindyewu ndi muswè bwa bantu bònsò bàdi mu ekeleeziya emu bìikalè mu disambila. Nenku mèmè nèntuulukè nye kasambila. Nwènu bònsò tungunukàayi anu ne kwikala mu disambila mpindyewu, pàndi mèmè nya ne mulongo wà babèèdi ewu too ne ku ndekeelu apa, ndòmba, ntentekelangana anu byanza ne ngamba dibènesha.

<sup>219</sup> Nenku, vùlukàayi ne, yònsò wa kunùdi yèyè ne mpekaatu udi kàyi mutonda to, bimanyiiwbè kùdi ne Nzambi kààkukwondopakù ne mpekaatu udi kàyi mutonda awu nansha. Longòlòlà bwalu abu, kumpàlà kwa wèwè kupicila kaaba aka, bwalu ncifwànyine kutàmba kukunyangila bwalu. Wamònu anyi?

<sup>220</sup> Mpindyewu kî mmu dijingulula to. Dijingulula, ntu njandula bintu abi. Kàdi, kadi eci kî ndijingulula to, ndi munkaci mwa kukeba mudimu wà bwambi mupyamùpyà. Nwènu bònsò nudi nuumvwa bìmpè anyi? Eyo. Mpindyewu itàbùùjaayi.

Mpindyewu túsambilàayaaku patùdi biinyike mitu yetu apa.

<sup>221</sup> Taatù Nzambi, tushoonyi twà minu yànyi tùcidi anu pa cyambilu eci, twà kùkaadi mèbà ne mèbà, kwènji mpindyewu bidimu makumi asatu anyi bipite apu, bìndi mwimàne kaaba aka nyiisha, ne pa buloba bujimà. Ne Wèwè udi mushindike Evanjeeliyo ùndi muyiishè, bwalu Mukenji mmufumine kùdi Wèwè. Mèmè kacya ncitukù muyè ku tulaasà kanà twònsò etu to, ncitukù mukonkè muntu to pa kuumusha Wèwè, mwikàle mbala Diyì Dyebe ne ngindila bwa kumòna civwà Nyuma mufwànyine kwamba bwa kwenza.

<sup>222</sup> Nenku mpindyewu, Mukalenge, Wèwè ngudi mumanyè bwalu bwa mudimu wa bwambi wà Maakò 11.23 ewu, ne mumanyè ne dîbà dikaadi pabwîpì, mumanyè ne ndi mwambè mu bulelèlà bwònsò bwalu bwa nshìndi ayi, ne bwa Mwanèètù wa bakàji Hattie ne bânà bèndè bàà balùme abu. Mpindyewu, Taatù, ne bu mùdibi ne cikènà-kumòna cyàkalwà kùndi kuntu kwàka mu bulààlù, mu dinda adi aci. Ngàkamòna Bible awu, ne pashiishe nkùrusè, ne pashiishe Wèwè. Ne mwàkabuuludiibwàci mu meeji àanyi ne bìdi bikèngela ncitàbè, bwalu ncishindika.

223 Mpindyewu, Mukalenge, nyewu nntùngunuka mu dinda emu mu ekeleeziya wanyì, bwa kwimana kaaba aka mu dinda dya Paasàkà edi, mwikàle ndòmba bwa Ùmbàndishèku ku dipà dipyadiya, dya bukolè butàmbidile, bwa bwalu bwa bantu, dya bukolè butàmbidile. Kaciya bwa lupàndù lwanyì mèmè to; bwalu mèmè Ukàadi munsungile, Mukalenge, kujikè. Kaciya bwa mèmè mwine to; nkàadi mubènge bintu binène byònsò, bwa kuKumanya Wèwè. Anu mÙvwà mungambile ku ntempèlù munène kwàka, ditùkù adi amu ne: “Mèmè ki cyebe citùpà.” Mpindyewu, Mukalenge, mèmè ngùikalèku Cyebe citùpà, bwa ngaamònakù mwa kuKulengeleela, bwa Nyuma Webè kulwaYè munda mwanyì. Nenku pàngàatentekelà bantu bàà musinga mukolè aba byanza, bàdi bàsaamà aba, swàku bwa Nyuma Webè, Mukalenge, ènzè mudimu wàshààlà awu. Ki cyònsò cìndiku pàanyì mumanyè mwa kwenza, Mukalenge.

224 Ndi muvùlùke mudimu muntùma naawù ne, ndi “mulela bwa kusambidila babèedi, kubàfikisha ku kwitabuuja, ne ne wèwè kwikala ne meeji matòoke paùdi usambila.” Mukalenge, mèmè ndi anu . . . Ncyèna mumanyè mwa kwikala ne meeji matòoke kupita apa to. Ndi—ndi . . . Nyawu bàsaama, Mukalenge. Ne mèmè nkàadikù—nkàadikù musaamè, mèmè mwine. Bu Wèwè mwa kuswà, Nzambi Munanga, enzàku bwa bòndopiwbè, muntu ne muntu.

225 Nyewu nya kumpàla mpindyewu, Mukalenge, ku diitabuuja, anu mwàkaseemènà Mòsà ku Mbù Mukunze amu. Ndi nguumukila ku cyambilu cinsantu eci, nya ku mulongo wà babèedi ewu, mu Dìna dya Yesu Kilisto. Swàku bwa Nzambi Uvwa mumpèeshe nshindì ayi awu, Nzambi Uvwa mupèeshe Mwanèètù wa bakàji Hattie mèyi awu awu, Nzambi Uvwa mumpèeshe mwa kuamba awu, swàku bwa Yèyè awu àye naanyì. Ndi nya mu Dìna dya Yesu Kilisto. [Mwanèètù Branham ùdi ùshiyà cikòlokolo bwà kusambidila babèedi, àbùngi a ku mèyi èndè mmakolè bwà kuùmvwa—Muf.]

226 Sàtaanà, ndi nkupùisha . . . wèwè, mu Dìna dya Yesu Kilisto, bwa ùshiyè mwànà wa mu dibòkò ewu. Mushiyè, pàtukà munda mwa mwànà ewu; ndà, ne mwàna ewu àsangalè.

227 Ndi ntentekela mwanèètù wa balùme byanza, mu Dìna dya Yesu Kilisto, ne mpiùsha lutàtù lùdi mu mubidi wèndè elu. Amen.

Mu Dìna dya Yesu Kilisto, pèeshakù mukàji ewu dilòmbà dyèndè.

228 Mukalenge, mu Dìna dya Yesu Kilisto, pèeshakù Mwanèètù wa bakàji Ruth dyondopa dyèndè. Amen.

229 Nènsambidilè mwànà wa mu dibòkò awu. Kàdi ndi—ndi ntùluka ku cyambilu cyàcya . . . Utu musòmbèle penyì? [Mwanèètù wa bakàji awu ùdi wàmba ne: “Bloomington.”—Muf.] Bloomington, Indiana anyi? Wamfùdilakù mukàndà bwa bwalu

bwa mwânà wa mu dibòkò ewu. Mûle difù dyônsò kaaba aka mpindyewu. Newitabuuje anyi, inábànza, ne ncyà bushuwa? [“Ndi ngiitabuuja ne ncyà bushuwa.”]

<sup>230</sup> Nanku, Taatù, nyewu ntentekela . . .mwânà wa mu dibòkò ewu byanza, ne mpiisha démon ewu. Umùkà mu mwânà ewu. Ne swàku bwa yêyè . . .? . . .Swàku bwa ikalèku mpindyewu mùdì bantu bônsò ne mwânà ewu òndopiibwè.

Wamfùdilakù mukàndà, mu ndambu wa matùkù emu.

<sup>231</sup> Nudi bamòne mwânà wa mu dibòkò wa mèsù a bulèngù udi mulààdika pàapa wàwa anyi? Wèwè kùyì wela kabidi mpatà to, newàlukilè ne mwânà *awu* ne ulejanganà mwikalàye ùkaadi mùdì bantu bônsò ne mwondòpiibwè.

<sup>232</sup> Ndi ntentekela mwanèètù wa bakàjì ewu byanza. Nenku yêyè ikalèku ne lwidì lwà mukàjì mwena Syrophénicie awu. Ne òndopiibwèku mu Dîná dya Yesu Kilisto . . .? . . .

Mwoyi wòndopiibwè, mu Dîná dya Yesu Kilisto.

<sup>233</sup> Ndi ngamba mèyi aa. Ùdi ne cya kwondopiibwa. Kacyèna mwa kwikala cîngà cintu to. Yesu wákamba ne: “Ndi mwa kucyèna, wèwè mwitablùje.” Mpindyewu, piikalàYe mwa kwenza ne nshindì àmweneke mushindu *ewu*, mwàkènzàYe bwa cimpàngà cya mukooko musangu kampànda, Yéyè’s ùdi mwa kwenza bwa mwoyi awu wùmwekè mùdì wà bantu bônsò ne wòndopiibwè. Bidi ne cya kwenzeka

Mu Dîná dya Yesu Kilisto, mwoyi awu wòndopiibwè. Enzàku nanku.

<sup>234</sup> Mpindyewu, aci kî ncipeepèle anyi? Ncipeepèle. Nzambi mmupwekèle bikolè, mu mushindu wà twètù tucipìcila pamutù. Mpindyewu wèwè ikalà anu mupwekèle bikumbàne mu mushindu wà kùyikù ukwèlela kabidi meeji to. Nebikumbanè.

<sup>235</sup> Mukalenge, mwanèètù wa bakàjì òndopiibwèku, mu Dîná dya Yesu Kilisto. Amen. Mwanèètù wa bakàjì . . .? . . .

<sup>236</sup> Mukalenge, mpindyewu nyewu ngàmbì mèyi aa, ne meeji matòòke ónsò pàndì njìkula kumpalà kwa bantu apa. Ngábàmbidi ne: “Wèwè mwambile mukùnà ewu ne: ‘Tentèmùka,’ ne kùyì wela mpatà to, udi mwa kupeta cyuwàmbì aci.” Mu Dîná dya Yesu Kilisto, lutàtù elu lùumushiibwè, ne ntàtù yebe yònsò yùdì naayi ayi. Mpindyewu kwèdikù mpatà to. Seemènà anu pabwipi Nendè mene mpindyewu.

<sup>237</sup> Mukalenge, nyewu ntentekela mwânà mukese udi ne mutù wùmusaama bikolè ewu byanza. Mu Dîná dya Yesu Kilisto, swàku òndopiibwè. Amen.

<sup>238</sup> Mukalenge, mu Dîná dya Yesu Kilisto, mukùnà awu ùmuumùkèku, swàku bwa yêyè òndopiibwè. Swàku mpindyewu bwa mwanèètù wa balume ewu òndopiibwè . . .? . . . Amen.

239 Mpudimaci-kamàmà; mpudimaci-kamàmà. Mukalenge, mu Dîna dya Yesu Kilisto! Nkàadi mwimàne muyiishèyishe ku ditùkù ne ku ditùkù, ku cidimu ne ku cidimu, kacya ncitukù mwanji kumòna diitabuuja dilwa mu dipetangana Neebe, kacya anu bândela, kakùyi cintu kampàndà cyenzèke to! Mpindyewu, yêyè ùdi mpudimaci mu dici dyèndè, ne kàamunda munda mwèndè amu. Swàku bwa òndopiibwè, mu Dîna dya Yesu Kilisto. Amen.

Mpindyewu, kwèdikù mpatà to.

240 Mukalenge, Wèwè udi mumanyè ntàtù ya mubidi wèndè. Ne byanza bimumentekela, ne mwoyi wà meeji matòoke, yêyè òndopiibwè, mu Dîna dya Yesu Kilisto. Amen.

241 Lufù ndulàale ku ciibi cimwè, diitabuuja ku ciibi cidi cìlonà. Nzambi, búngulujàku dibwe bwa diitabuuja dicimunè. Swàku bwa kànsèrè kàmuumùkè, mu Dîna dya Yesu Kilisto.

242 Mukalenge, swàku bwa yêyè òndopiibwè. Nyewu mmutentekela byanza. Mukenji wùcidi anu wèlela tungonga mu bimanu. Mu Dîna dya Yesu Kilisto, swàku bwa yêyè òndopiibwè.

243 Taatù Nzambi, nyewù ntentekela mwanèètù wa balùme byanza. Enzàku, Mukalenge, bwa Nyuma Webè ne bukòlè, bimumepèshè dilòmbà dyèndè. Biikalè nanku, mu Dîna dya Yesu Kilisto. Amen.

Kwàjikì. Mpindyewu kucyèdikù mpatà to.

244 Mukalenge, dijinga dya mwanèètù wa balùme ndya kubwela mu Bwikadi Bwebe, ne disaamà didiye naadi edi. Mpindyewu, mu Dîna dya Yesu Kilisto, swàku bwa àpetè cidiye ùlòmba aci. Amen.

245 Cintu bunene kaayipu's wè! Nyuma Mwimpè àlwekù pa mwànà ewu, bwa butumbi bwa Nzambi bwa bàmukolèshè too ne ku bwèndè. . . ? . . . Bwa bwalu bwa Bukalenge bwa Nzambi, swàku àcipetè. Amen.

246 Taatù, mu Dîna dya Yesu Kilisto, biikalèku nanku ne, mwanèètù wa bakàji òndopiibwè, ne dilòmbà dyèndè difidiibwè, mu Dîna dya Yesu. Amen.

247 Swàku bwa cyènjiibwe. Neùpetè Nyuma Mwimpè. Kakwèna mushindu nansha mukese wà kukupangisha bwa. . . ? . . . Udi ne cya kupeta! Udi ne cya kufika ku diMupeta, bwalu Nzambi mmwambè nanku. Ikàlà mwimànyìnePù.

Pandà anu kazubuzubu kakese aku ùpatukè muntwamu. Ambà anu. . . ? . . .

248 Taatù wa mu Dyulu, mu Dîna dya Yesu Kilisto, filakù dilòmbà dya mwanètù wa bakàji. Amen.

249 Taatù, mu Dîna dya Yesu Kilisto, filakù dilòmbà dya mwanèètù wa bakàji. Swàku bwa òndopiibwè. Amen.

250 Yèyè ùdi mwa kwenza bwa ne nshìndì ikalèku, misangu mwandamutekète milondàngàne. Yèyè ùvwa mwa kupèèsha mukàjì awu cintu kanà cyònsò cyàkalòmbàye; mMufwànyìne kukupèèshaci...?...

251 Mukalenge, mu Dìna dya Yesu Kilisto, filakù dilòmbà dya mwanètù wa bakàjì. N'Dìyì Dyebe. Twasàkidila. Ne swàku cìfidiibwè kùdiye, Taatù, ku Yesu Kilisto. Amen.

252 Bananga beebe anyi? Taatù, mu Dìna dya Yesu Kilisto, filakù ebi...?...

253 Mukalenge, mukàjì mukese wa beena Yudà ewu... Wèwè's udi Nzambi wa Abraham. Filakù, mu Dìna dya Yesu Kilisto, dilòmbà dyèndè. Biikalèku nanku!

254 Mu Dìna dya Yesu Kilisto, Nzambi wa mu Dyulu, filakù dilòmbà dyèndè. Amen.

255 Mwànà mukese wa bakàjì ewu. Anu pawàfikì pa cibùmbà cya ku cyambilu pàapa, Nzambi ùvwa munkaci mwa kungambila byònsò pa bìdì bitàngila nsòmbelu webè. Yèyè neàkuumùshè dinyunguluka dya mutù adi.

256 Mukalenge, ndi mpiisha dinyunguluka dya mutù kùdi mwànà wa bakàjì ewu. Swàku bwa dimuumùkè pa dībà edi ne yèyè àpatukè kaaba aka ne disànkà divulè. Neciikalè nanku, mu Dìna dya Yesu Kilisto.

257 Nzambi wa mu Dyulu, Wèwè wàkabiisha Mwan'Èbè ku lufù, Yesu awu, mu dibìikà dya ku lufù ditùdì twètù tutwila cyanga edi, swàku bwa mwànà wa bakàjì ewu àtambè kuditwila yèyè cyanga leelu ewu...?... Mu Dìna dya Yesu. Amen.

258 Mu Dìna dya Yesu Kilisto, Mwànà wa Nzambi, ndi ntentekela mwanètù wa bakàjì byanza, mwikàle ndòmba bwa yèyè òndopiibwè mpindyewu mu Dìna dya Yesu.

259 Mu Dìna dya Mukalenge Yesu Kilisto, Mwànà wa Nzambi, swàku bwa mwanètù wa bakàjì òndopiibwè. Amen. Kacyèna mwa kumulama to. Cìdi ne cya kuumuka. Ndàaku, eci cidi anu ne cya kuumuka.

260 Mukalenge, mu Dìna dya Yesu Kilisto, swàku bwa mwanètù wa bakàjì òndopiibwè. Amen. Mu Dìna dya Yesu Kilisto, ndi ngondopa ewu, mwanètù wa bakàjì. Amen.

Mu Dìna dya Yesu Kilisto, ndi ngondopa mwanètù wa bakàjì. Amen.

Mu Dìna dya Yesu Kilisto, ndi ngondopa mwanètù wa bakàjì.

Mu Dìna dya Yesu Kilisto, ndi ngondopa ewu, mwanètù wa bakàjì.

Mu Dìna dya Yesu Kilisto, ndi mmupèèsha dilòmba dyèndè. Amen.

261 Mu Dîna dya Yesu Kilisto, ndi mpèèsha maamù mukese ewu dilòmba dyèndè.

Mu Dîna dya Yesu Kilisto, ndi mmupèèsha dilòmba dyèndè, Mukalenge.

Mukalenge, mu Dîna dya Yesu Kilisto, ndi mmupèèsha dilòmba dyèndè.

262 Sataanà, ndi nkwiipata. Mu Dîna dya Yesu Kilisto, shiya mukàji ewu.

263 Yèyè ùvwa mukulamè muswika ntàntà mule. Udi musùlùdiibwe mpindyewu. Newòndopiibwè. Nebiikalè bîmpè mpindyewu, dibà adi. Cìtabùùjè mpindyewu.

264 Nzambi, mu Dîna dya Yesu Kilisto, mwanèètù wa bakàji ewu, udi cikalàbà ewu, ndi mmupèèsha dyondopiibwa dyèndè. Amen.

265 Mu Dîna dya Yesu Kilisto, ndi mpèèsha mwanèètù wa bakàji ewu dyondopiibwa dyèndè. Amen.

266 Mu Dîna dya Yesu Kilisto, mwanèètù wa bakàji, ndi nkupèèsha dyondopiibwa dyebe. Amen. Biikalè nanku!

267 Ndi ne dyeyemena kùdi Nzambi ne ncyèna ngenza ntùpàkànyì to. Enzàku nanku, ku diitabuuja. Biikalèku nanku!

268 Udi witabuuja ne Nzambi ùdi ùkupèèsha dikàndà bwa kwondopa ne disaamà dya mwoyi pààdi anyi? Udi witabuuja bwalu bûngàfumu ku dilonda abu anyi? Ne mwoyi wèbè wònsò? Nanku ndi nkupèèsha dyondopiibwa dyebe. Mu Dîna dya Yesu Kilisto, ndi nkupèèsha dyondopiibwa dyebe.

269 Mukàji wafumu ku dyalukila kaaba aka ewu dîna dyèndè nganyì? Utu musòmbèlè lwà pabwìpi apa mu mwaba kampànda anyi? [Mwanèètù wa bakàji awu ùdi wàmba ne: “Eyowa.”—Muf.] Ùvulukè ne udi mwondòpiibwe! Aci ncilelèlè anu mündi mwimàne kaaba aka emu.

270 Taatù, mu Dîna dya Yesu Kilisto, enzàku cyòci eci, ndi ndòmba, dyondopiibwa dyèndè. Amen.

271 Taatù, mu Dîna dya Yesu Kilisto, swàku àpetè dyondopiibwa dyèndè. Amen!

272 Ndi—ndi—ndi njikula ne udi...Ndi—ndi—ndi...Ku ngàsà wa Nzambi, ku Dipà dya kùdi Nzambi, ndi nkupèèsha dyondopiibwa dyebe! Kabidi, ndi ngiipata démon awu.

273 Udi witabuuja anyi Mwanèètù wa bakàji Rose? Éyi Mukalenge, Mufùki wa maulu ne buloba, pèèshakù Mwanèètù wa bakàji Rose Austin ewu dyondopiibwa edi, Mukalenge, mu Dîna dya Yesu Kilisto. Amen. Ki cyòci aci, Mwanèètù wa bakàji Rose, ndààku mpindyewu mwikàlè witabuuja.

274 Mukalenge, pèèshakù mwanèètù wa bakàji ewu dyondopiibwa dyèndè, mu Dîna dya Yesu Kilisto. Amen...?...

275 Udi witabuuja nanku anyi? Itàbùùjà kantu ne kantu kònsò kàà cyòci aci. Dìbà adi, ndi nkupèèsha dilòmbà dyebe, mu Dìnà dya Yesu. Nzambi neàmúsàngàjè.

276 Swàku bwa bìikalè nanku, Mukalenge, bwa mwanààbò wa balùme òndopiibwè, ne mu mubidi ne mu nyuma, mu Dìnà dya Yesu Kilisto. Amen!

Swàku bwa edi diikalè dìbà dya ne piikalà . . . ? . . .

277 Mukalenge, nyewù mmutentekela byanza, pàdiye kàyi ne ditèkemena nansha dikese apa, bwa kùdi bangàngàbukà anyi kùdi bwanga kanà bwònsò bwa ku maalu a mamanya. Kàdi kí nku disambakeena ne Kilisto mubiike ku lufù to. Mu Dìnà dya Yesu, swàku bwa yèyè òndopiibwè. Amen.

. . . ? . . .

278 Mukalenge, pèèshakù mwanèètù wa bakàji, mwikàle utèèleja ne ntèma yònsò dilòmbà dyèndè, utàbaleela dìyi ne dìyi dyònsò didiye mwambè. Mbwa bwalu bwa Bukalenge. Ndi ndòmba bwa Wèwè kumupèèshaci, mu Dìnà dya Yesu. Amen.

[Mwanèètù wa bakàji kampànda ùdi wàkula ne Mwanèètù Branham—Muf.] . . . ? . . .

279 Mukalenge, mèmè bu musadidi Webè, mwikàle ntèèleja mùdi maamù awu ùdila bwa mwanèndè wa mu dibòkò, ndi mpiisha démon udi mwenzè ciine eci ewu.

280 Nanku mwimànyine pa dijìkula dya diitabuuja dya mukàji ewu, ndi ngiipata démon ewu. Kwàkukùmbana bwa kucibwila mwána ewu panshi nansha. Ondòpiibwà mu Dìnà dya Yesu. Amen.

Yèyè ùdi anu munkaci mwa kwondopiibwa, mwanèètù wa bakàji. Kùcyèdikù mpatà to, nansha kakese. Nzambi àkubènèshè, mwanèètù wa balùme. Awu mmwanèèbè anyi? Àpetèku Nyuma Mwimpè!

281 Kwèna mwa kwangatakù mwánà awu kuya nendè mu mwaba kampànda ne kumutèèlejakù bwa katanci kakese cyanààna anyi? Ndi ngiitabuuja ne cintu kampànda ncyenzèkèle mwánà awu. Neùcipetè. Udi witabuuja nanku anyi?

282 Mu Dìnà dya Yesu Kilisto mwanèètù wa balùme àpetèku dyondopiibwa dyèndè.

283 Mukalenge, swàku bwa Bukolè bwa Nzambi wa Bukolè bwònsò bùpiishè lutàtù lwà mubidi wèndè alu, ne bùmuujè ne Nyuma Mwimpè. Ki dìbà ndyòdi edi ne cikondo. Mu Dìnà dya Yesu Kilisto, ndi mmupèèsha Yè. Amen.

284 Nsùkaadi yàyi. Wàpecì Nyuma Mwimpè. Udi mupetè lutàtù kùkaadi ntàntà bule kaayi. . . ? . . . Kacya bàakulela. Udi witabuuja ne Kilisto neàkwondòpè ne neàkusùlùlè ku lutàtù elu; ùkuvwija mùdi bantu bònsò anyi?

285 Mmwanèèbè anyi? Dikàsà dyebe—dyebe. Udi mulwè anu wèwè nkààyeebè anyi? Bu ne mvwa—bu ne mvwa ne dikàndà munda mwànyì mêmè mwine's, wamònu's! Kàdi ndi ngiitabuujà ne Nzambi neànkwàcishèku bwa kwikala ne diitabuujà bwa cyòci aci. Nèngènzè cyònsò cidì mu bwànyì bukòòkeshi aci. Udi mungiitabùùje anyi? Udi mwiitabùùje bwalu bwa nshindì ayi abu anyi? Udi witaabuujà? Udi witaabuujà ne bìdi mwa kwenzeka ne, mu dinda emu, Nzambi mmufwànyine kwondopa mubidi wèbè, ne wèwè kwendela cyàkàbìdi kuulu, wenda mùvwàbì bìkèngela bwa wèwè kwenda ku cibangidilu anyi? Kùdi anu cintu kampàndà cidì cyenzèke ku dilediibwa dyebe aku, kùdi cintu kampàndà cidì cicyàmàkàne cikwabo cintu ndambu ne wèwè kùyi anu mukolè mùvwàbì bìkèngela to. Anu mùdi ditàmbà dikolela pa ditàmbà dikwabo, didilaminyina panshì's. Ee, bu ditàmbà adi mwa kuumuka pa dikwabo ditàmbà adi, nedìikalè mwa kululamijiibwa ne kwikala dîmpè. Wamònu anyi? Ncya bushuwa anyi? Mmulawu. Mmulawu. Bu mulawu awu mwa kuumuka, dîbà adi neùmvwè bìmpè. Wamònu anyi?

286 Mukalenge, nyewu ngeela meeji ne, ambà tũng bu ne yèyè ewu ùvwa mwanàànyì, ambà tũng bu ne yèyè ewu ùvwa mwanèètù wa balùme? Ku diitabuujà, ndi nguumusha mulawu awu, mu Dîná dya Yesu Kilisto. Amen.

287 Mukalenge, ndi mmutentekela byanza ne ndòmba dyondopiibwa dyèndè, mu Dîná dya Yesu Kilisto. Amen.

288 Taatù Nzambi, mu Dîná dya Yesu Kilisto, ndi ntentekela mukàji udi usaama ewu byanza, bwa dyondopiibwa dyèndè. Amen.

Mwanèètù wa bakàji Nash, Nzambi mmukusùngile ku kànsèrè, kùkaadi ndambu wa bidimu.

289 Mukalenge, pèeshakù Mwanèètù wa bakàji Nash dilòmba dyèndè. Mêmè bu musadidi Webè, ndi ncilòmba. Necyènjiibwè. Ki dyandamuna ndyòdì adi, Mwanèètù wa bakàji Nash.

Mu Dîná dya Yesu Kilisto, pèeshakù mwanèètù wa bakàji dilòmba dyèndè. Amen.

290 [Mwanèètù wa balùme kampànda ne wa bakàji bàdi bààkula ne Mwanèètù Branham—Muf.] Twasàkidila, mwanèètù wa balùme, nenku alùkilà kùdi bàà kwenu bàvwàpu abu. Nzambi àcifilèku. Cikondo cilenga cya dikèma, bàà kwenu bààkadikùngwijilakù pàmvwà kuntwaku apu. Wèwè uvwa mu Bombay patùvwàku apu anyi? Ee, nenku udi witaabuujà bintu ebi bìndì . . . biùmvwù abi anyi?

291 Mukalenge, pàdiye wàlukila ùya kùdi bàà kwabo dyàmwàmwà dya mbù apa, swàku àye muujìbwe tètè ne Bukolè bwa Nzambi, mwondòpiibwe mu dilòmba dyònsò didiye ùlòmba adi. Swàku bwa àye ne àcipetè, mu Dîná dya Yesu Kilisto. Amen.



292 Mu Dîna dya Yesu Kilisto, Mwânà wa Nzambi, swàku bwa mwanèètù wa bakàji àpetè dilòmbà dyèndè.

293 Mukalenge, filakù dilòmbà dya mwanèètù wa bakàji. Swàku bwa lutàtù lwèndè lwimanè anu mpindyewu ewu, ku dibìikà dya ku lufù dya Yesu Kilisto. Amen. Mwanèètù wa bakàji, cìdi ne cya kwenzeka, cìdi anu ne cya kwenzeka!

294 [Mwanèètù wa bakàji kampànda ùdi wàkula ne Mwanèètù Branham—Muf.] Udi muswe bwa eci cyènzekè cyàkàbìdi mu Evanjeeliyo anyi? [“Eyowa.”]

295 Mukalenge Nzambi, pàdi nsongàakàji ewu mwimàne kaaba aka apa, kî mbwà tubingilà kampànda twà citù to. Ùdi ùsambila bwa mwanààbò wa balùme, udi ne kîshì mu mashi. Ndi mmupèèsha dilòmbà dyèndè. Ku mudimu muntùma naawù mumpèèsha kùdi Mwanjelo; ne ku cikèènà-kumòna cya kùdi Yesu Kilisto, kwènji ndambu wa mbingu, mu cibambalu cyànyì; ndi mpèèsha mwânà wa bakàji ewu dilòmbà dyèndè. Amen.

296 Cìdi ne cya kwenzeka. Wèwè utu musòmbèle pabwìpi apa anyi? [Mwanèètù wa bakàji awu ùdi wàmba ne: “Memphis, mu Tennessee.”—Muf.] Memphis, mu Tennessee. Wamfundilàkù mukànda. Neù—neù—neùpetè dilòmbà dyebe.

297 Mwanèètù Grimsley. [Mwanèètù awu ùdi wàkula ne Mwanèètù Branham—Muf.] Nzambi àkubènèshè, Mwanèètù Grimsley.

298 Mukalenge, tudi mwa kuvùluka ntàntà udi mwanèètù wa balùme ewu mufùme, ne bwinà bùvwàbo bamupàtùle. Ùdi ùjinga Nyuma Webè wabùngi, Mukalenge. Cyôci eci ncìndi mmupèèsha, mu Dîna dya Yesu Kilisto. Pa kumòna byenzedi byèndè bya matùkù àkaadi mapite, bya ne yèyè ùvwa ùteeta bwa kuKulonda Wèwè, pashìishe, ku Bukolè bwa—bwa mudimu muntùma naawù mumpèèsha kùdi Yesu Kilisto, mushindika kùdi Mwanjelo ne cikèènà-kumòna, Ndi mpèèsha Mwanèètù Grimsley dijinga dyèndè. Muujèku tètè ne diitabuuja, ne nsòmbelu wa sheemàsheemà wikalayè nendè awu.

299 Ambàbi tǔng bu mèmè mukwambile ne, “Ndàaku wòndopiibwè, bwa bwalu bwa Bukalenge bwa Nzambi”? Udi mwitàbùje bìngàmbi bwa nshìndi ayi abi ne bikwabo, ne udi witabuuja ne bìdi bulelèlè anyi? Dìbà adi, Yèyè, Yèyè ùdi ùmpèèsha cìndi ngambila “mukùnà” ewu aci . . . ? . . . Kwàkupeta mukwabo to. Kwàkupeta mukwabo to. Kakwàkwikala kabidi disaamà to, nwènù bònsò babidi, nenwikale bondòpiilwe.

300 Ndi mfilà dilòmbà dìdiye ùlòmba edi, mmupèèshadi, mu Dîna dya Yesu Kilisto. Amen.

301 Taatù Nzambi, filakù kùdi ewu ewu, mwanèètù wa bakàji ewu, dilòmbà dyèndè, mu Dîna dya Yesu Kilisto. Amen.

Eyo, mwanèètù wa bakàji, ndàaku, ùcitàbuujè.

302 Taatù, pàdi mukàjì ewu ùpita apa, ndi ndòmba bwa Ùmupèeshèku dilòmbà dyèndè, mu Dîná dya Yesu Kilisto. Amen.

303 Mu Dîná dya Yesu Kilisto, ndi mpèèsha mukàjì ewu dilòmbà dyèndè. Amen. Kùcyédìku mpatà to.

304 [Mwanèètù wa bakàjì kampànda ùdi wàkula ne Mwanèètù Branham—Muf.] Udi witabuujà ne neùcìpetè anyi? [“Eyowa.”] Dìbà adi ndi nkupèèsha dilòmbà dyebe, ku Bukolè bufla kùndi ku mudimu muntùma naawù wà Yesu Kilisto, ne mufidila bujaadiki . . . ? . . . Ndàaku, nenku—nenku Nzambi neikalè neebe.

305 Mwanèètù Fred, cìdì pa mwoyi wèbè ncinyi? [Mwanèètù Sothmann ùdi wàkula ne Mwanèètù Branham—Muf.] Mwanèètù Freddie Sothmann, ndi mpiisha mulùngù awu mu mubidi wèbè. Wùkuumùkèku, mu Dîná dya Yesu Kilisto. Amen.

306 Mwanèètù Collins. [Mwanèètù Collins ùdi wàkula ne Mwanèètù Branham—Muf.]

307 Mukalenge, mwanèètù wa balùme wa musinga mukolè ewu ùdi munkaci mwa kukèba Nyuma Mwimpè. Mukalenge, ne byònsò bìdì munda mwànyì, ndi njìkula Dibènesha edi pa Mwanèètù Collins. Enzàku nanku. Swàku bwa Nyuma Mwimpè àlwe pambidi pèndè, ne yèyè ùjiibwèku tèntè ne Nyuma Mwimpè! Amen.

308 Mwanèètù Collins, udi ne cya kuMupeta, Ùdi ne cya kulwa. Nzambi ùtu anu ùtùpicisha ku mateeta cyanààna.

309 Mukalenge, filakù dilòmba dyèndè. Swàku bwa àKukwàcìlè mudimu, ne dikù dyèndè dìKukwàcìlè mudimu, ne myoyi yabo yònsò.

310 Nzambi, pèèshakù mwanèètù wa bakàjì dilòmbà dyèndè. Bwa byònsò byàlòmbuyè ebi, swàku àbìpetè, ku Yesu Kilisto Mukalenge wetù. Amen.

311 Mukalenge, pèèshakù mwanèètù wa balùme ewu dikàndà bwa kukwàcìsha ekeleeziya wendè. Swàku bwa eci cìfidiibwè. Ndi mmupèèsha dikàndà edi, mu Dîná dya Yesu Kilisto. Amen.

312 [Mwanèètù wa bakàjì kampànda ùdi wàkula ne Mwanèètù Branham—Muf.] Mwanèètù wa bakàjì, aci's ncintu cya cìkwàcìsha bwòwà cyùdì naaci aci, dinyùnguluka dya mutù. Udi witabuujà ne cìngààkwambilà ncilelèlà anyi? [“Eyowa, ndi ngiitabuujà.”] Udi witabuujà nanku mpindyewu ne, ndi—ndi mukwambile bulelèlà anyi? [“Eyowa.”] Nenku ndi nkupèèsha dyondopiibwa dyebe, mu Dîná dya Yesu Kilisto. Cya bushuwa anu mündì mwimàne mu cyambilu emu, dinyùnguluka dyebe dya mutù adi dyàkuumùkù.

313 [Mwanèètù wa balùme kampànda ùdi wàkula ne Mwanèètù Branham—Muf.] . . . ? . . . Ncimwènèke, pambidi peebe pajimà.

<sup>314</sup> Mukalenge Nzambi, kùdì mwakùnyàànyì wa balùme wa mushinga mukolè ewu, bwondòke ne ndòndò ya nyuma wendè yìdì yìbùkila mùdì ndòndò ùbìkila Ndòndò awu. Ùdi ùjinga Nyuma Mwîmpè. Mmuneemèke disangisha Dyebe, Mukalenge, mu mushindu wònsò wùvwàye pèndè mufwànyine kwenza awu. Ku Bukolè bwa Nyuma Mwîmpè, swàku bwa Yéyè àlwe pambidi pàà mwanèètù wa balùme, ne ùjìibwè tètè ne Bukolè ne ngàsà wa Nzambi, Nyumà Mwîmpè. Mwakìdilèku, pândì mmulàmbula mu . . .



*NDÁAYI, NŪKAMBÈ* LUA60-0417M  
(Go, Tell)

DILONDANGANA DYA MAYIISHA À PAASÀKÀ

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dinda dya dyàlumingu dya Paasàkà, mu matùkù 17 a ngondo mwinâyì, cidimu cya 1960, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)